

ম্যাক্সিম গর্কি

অমল দাশগুপ্ত

১২

স্টারলাইন ২ গণেন্দ্র মিহি লেন
কলিকাতা ৭০০ ০০৪

প্রথম প্রকাশ : আগস্ট ১৯৫৫

প্রচ্ছদ : দেবব্রত ঘোষ

প্যাপিলাস -পক্ষে অরিজিন কুমার, ২ গণেন্দ্র মির্জা
লেন কলকাতা ৩ কর্তৃক প্রকাশিত ও টেক্নোপ্রিণ্ট,
৭ হাইল সড় লেন কলকাতা ৩ কর্তৃক মুদ্রিত।

প্রকাশকের নিবেদন

ছোটোদের জন্য আমাদের জীবনী-সিরিজের সপ্তম গ্রন্থ
হিসেবে প্রকাশিত হলো ‘ম্যাঞ্জিম গ'কি’। এ-বই প্রথম ছাপা
হয়েছিল প্রায় চল্লিশ বছর আগে। এর লেখক অমল
দাশগুপ্ত এখন প্রয়াত। তাঁর অজনেরা বইটির পুনঃপ্রকাশে
সম্মত হয়েছেন বলে তাঁদের বিশেষ কৃতজ্ঞতা জানাই।

কেউ যদি তোমাকে জিজ্ঞেস করে, আচ্ছা বলো তো, পৃথিবীর সমস্ত ভাষায় লেখা যত উপন্যাস আছে তার মধ্যে কোন্ উপন্যাসটি সবচেয়ে বেশি লোক পড়েছে—তাহলে কী জবাব দেবে? সবচেয়ে বেশি লোক পড়া মানেই সবচেয়ে বেশি ভাষায় অনুবাদ হওয়া আর সবচেয়ে বেশি বিক্রি হওয়া। এমন কোন্ উপন্যাস আছে?

এই উপন্যাসটির নাম ‘মা’ আর এই উপন্যাসটির লেখকের নাম ম্যাঙ্গিম গর্কি।

‘মা’ ছাড়াও ম্যাঙ্গিম গর্কি আরো অনেকগুলি উপন্যাস লিখেছেন। তাঁর লেখা ছোটোগল্প ও প্রবন্ধের সংখ্যাও কম নয়। তবে তাঁর চেয়েও বড়ো কথা হচ্ছে এই যে তিনি এমন এক সময়ে এই লেখাগুলি লিখেছেন যখন তাঁর নিজের দেশ রাশিয়ায় একটা বিপ্লব হয়েছিল। ‘বিপ্লব’ কথাটা তোমরা সবাই শুনেছ, কিন্তু কথাটার ঠিক মানে কী তা হয়তো অনেকেই বলতে পারবে না। তোমাদের মধ্যে যারা ভল্টেয়ারের জীবনী পড়েছ তারা ফরাসি-বিপ্লবের কথা নিশ্চয়ই জান। ফরাসি-বিপ্লবের ব্যাপারটা আসলে কী? সাধারণ মানুষ রাজার হাত থেকে ক্ষমতা ছিনিয়ে নেয় এবং নিজেদের মতো করে দেশকে গড়ে তোলবার চেষ্টা করে। এই তো? অর্থাৎ একটা কিছুকে ভেঙে ফেলে আর একটা

কিছু গড়ে তোলা । আর এই নাম বিপ্লব । আমাদের দেশে ১৯৪২ সালের আগস্ট মাসে যে আন্দোলন হয়েছিল তাকে অনেকে বলে বিপ্লব । কিন্তু আসলে তা বিপ্লব নয় । সে-সময়ে দেশের মানুষ ইংরেজ রাজত্বকে ভেঙে ফেলতে চেয়েছিল । কিন্তু নতুন একটা কিছু গড়ে তুলতে পারেনি । তাই আগস্ট মাসের আন্দোলনটা আসলে বিপ্লব নয়—বিদ্রোহ । কিন্তু ফরাসি-বিপ্লব ছাড়াও সত্যিকারের আরেকটা বিপ্লব হয়েছিল ঝঁশদেশে ১৯১৭ সালে । এই বিপ্লবে রাশিয়ার সাধারণ মানুষ তাদের জারকে সিংহাসন থেকে তাড়িয়ে দেয় এবং নিজেরাই নিজেদের দেশকে নতুন করে গড়ে তোলে । একবার ভাবো তো দেখি, সাধারণ মানুষের কত বড়ো জোর থাকলে পরে দেশের রাজাকে তারা রাজ্যছাড়া করতে পারে ? এই জোর কোথেকে এসেছিল জান ? নাম করে বলা যায়, মাত্র দু-জন মানুষ তাদের মনে এই জোর এনে দিয়েছিলেন । একজন হচ্ছেন লেনিন এবং অপরজন ম্যাঞ্চিম গর্কি । লেনিন জোর এনেছিলেন নিজের একটা দল গড়ে তুলে, আর গর্কি জোর এনেছিলেন বই লিখে ।

শুধু লেখার জোরে যদি একটা দেশের চেহারা বদলে দেবার মতো অবস্থা তৈরি করা যায়—তাহলে একবার ভাবো তো সেই লেখার কত জোর ! এমনি জোরালো লেখা লিখতে পেরেছেন বলেই ম্যাঞ্চিম গর্কি চিরকাল অমর হয়ে থাকবেন । তিনি কতগুলি উপন্থাস আর কতগুলি গল্প লিখে-

ছেন সে-হিসাব কেউ করতে বসবে না। চিরকাল সবাই মনে
রাখবে যে এমন লেখা তিনি লিখেছেন যা একটা গোটা
দেশের মানুষকে বিপ্লবের জন্মে তৈরি করেছে।

ম্যাঞ্জিম গর্কির আসল নাম আলেক্সি ম্যাঞ্জিমোভিচ
পেশ করত। সবাই ডাকে আলয়োশা বলে।

বাবার কথা ভাবতে বসলে আলয়োশার চোখের সামনে
একটি দৃশ্য ভেসে ওঠে।

আন্তর্বাখান শহরে ছোট ঘুপ্সি একটা ঘর। জানলার
ঠিক নিচেই আগাগোড়া শাদা পোশাক পরিয়ে আলয়োশার
বাবাকে শুইয়ে রাখা হয়েছে। আর বাবার পাশে হাঁটু মুড়ে
বসে আছেন আলয়োশার মা।

আলয়োশার একটা হাত ধরে আছেন আলয়োশার
দিদিমা। তিনি বারবার বলছেন, যাও বাচ্চা বাবাকে শেষ
দেখা দেখে নাও।

আলয়োশার বয়স তখন চার বছর। দিদিমার সঙ্গে এই
তার প্রথম দেখা। সবে সে খুব একটা শক্ত অসুখ থেকে
উঠেছে। অসুখের প্রথম দিকে বাবাই দেখতে আসতেন
তাকে। তারপর বাবা পড়লেন অসুখে। তখন নিবানি-
নভ্যোরোদ থেকে এলেন আলয়োশার দিদিমা। তিনি
এসেই এই চার বছরের শিশুটির মন জয় করে নিলেন।

আর এই একই দিনে আর একটি ঘটনা ঘটে। বাবার
মুত্তুশয্যার পাশেই আলয়োশার ছোটো ভাইটির জন্ম হয়।
অল্প কয়েক দিন মাত্র এই ছেলেটি বেঁচেছিল।

বাবার কথা ভাবতে বসলে তারপরে আলয়োশার মনে
পড়ে এক বর্ষার দিনের কথা। একটা পিছিল মাটির টিবির
ওপরে আলয়োশা দাঢ়িয়ে আছে আর একটা গর্তের মধ্যে
নামানো হচ্ছে তার বাবার কফিন। গর্তের তলায় জল
জমেছে, ব্যাঙ লাফালাফি করছে – আর ছুটো ব্যাঙ কফিনের
হলদে ডালাটোর ওপরে লাফিয়ে উঠেছে। তারপর কবরে
মাটি চাপা দেওয়া হয়। ব্যাঙছুটো চাপা পড়ে যায় মাটির
নিচে।

এই ব্যাঙছুটোর কথা বহুদিন আলয়োশা ভুলতে পারেনি।
সমাধিস্থান থেকে বেরিয়ে এসে দিদিমা আলয়োশাকে
বললেন, হঁা রে তুই কাদছিস না কেন? একটুখানি কেঁদে নে।

আলয়োশা বলল, আমার কান্না পাচ্ছে না দিদিমা!

শান্তস্বরে দিদিমা বললেন, ঠিক আছে, যদি কান্না না
পায় তো কাদিস নে।

আলয়োশা সাধারণত কাদে না। শরীরে ব্যথা পেলে তার
কান্না আসে না। আবার কেউ একটু আদরের কথা বললে
বা অন্য কারও কষ্ট দেখলে ঝরঝর করে কেঁদে ফেলে।

কাদা-প্যাচপেচে রাস্তা দিয়ে বাড়ি ফিরবার পথে
আলয়োশা জিজেস করে, আচ্ছা দিদিমা ব্যাঙগুলো কি
বেরিয়ে আসতে পারবে না?

দিদিমা জবাব দেন, না পারবে না।

এই প্রশ্ন আবার আলয়োশা জিজেস করেছিল জাহাজের

এক নাবিককে। বাবা মারা যাবার পরে আন্তর্খানের বাড়ি
উঠিয়ে দিয়ে আলয়োশা আৱ তাৱ মা ফিৱে চলেছে নিব্বন্ধন-
নভ্যোৱাদে। সেখানে আলয়োশার দাদামশাই আছেন,
মামা-মামিৱা আছে, আৱ আছে অনেক মামাতো ভাইবোন।
আলয়োশার ছোটো ভাইটি জাহাজেৰ কেবিনেই মারা যায়।
সারাতত নামে একটা শহৱে এসে আলয়োশার মা আৱ
দিদিমা জাহাজ থেকে নেমে ঘান বাচ্চাটিকে কবৱ দেৰার
জন্মে। আলয়োশাকে রেখে যাওয়া হয় কেবিনে। নীল-
পোশাক-পৱা একজন নাবিকও থাকে।

আলয়োশা নাবিকটিকে জিজেস কৱে, দিদিমা কোথায়
গো ?

নাবিকটি বলে, নাতিকে কবৱ দিতে।

— ওকে কি মাটি খুঁড়ে কবৱ দেওয়া হবে ?

— নিশ্চয়ই।

তখন আলয়োশা সেই ব্যাঙ্গচূটোৱ কথা জিজেস কৱে।
শুনে সেই নাবিকটি আলয়োশাকে বুকেৱ ওপৱ তুলে নিয়ে
চুমু থায় আৱ বলে, খোকন আমাৱ, তুমি এখনো কিছু বুৰাতে
পাৱনি। ব্যাঙেৱ জন্মে অত দৱদ দেখাৰাৱ দৱকাৱ নেই—
ব্যাঙেৱ দল চুলোয় ঘাক। তোমাৱ মা-ৱ অবস্থা দেখতে
পাচ্ছ তো ? শোক পেয়ে তিনি কৌ হয়ে গেছেন !

মা-ৱ অবস্থা সম্পৰ্কে তখনো আলয়োশার কোনো
ধাৰণা ছিল না। পৱে সে বুৰাতে পেৱেছিল, বাবাৱ মৃত্যুৱ

পরে মা নিজেকে অত্যন্ত অসহায় বোধ করেছিলেন। শোক করবার মতো মনের অবস্থাও তাঁর তখন ছিল না।

আলয়োশার মা এমন এক সময়ে বাপের বাড়িতে ফিরে চলেছেন যখন তাঁর ভাইরা অর্থাৎ আলয়োশার মামাৰা বিষয়সম্পত্তি ভাগবাঁটোয়াৰা করে নেবাৰ দাবি তুলেছে। আলয়োশার মা বিয়ে করেছিলেন বাপের অমতে স্বতুরাং আলয়োশার দাদামশাই সেই বিয়েতে এক পয়সা ঘোড়ুক দেননি। আলয়োশার ছই মামা এখন দাবি তুলেছে, এই ঘোড়ুকের টাকাও তাদের মধ্যেই ভাগ করে দিতে হবে। বাড়িতে যখন বিষয়সম্পত্তি নিয়ে এত বেশি ঝগড়াঝাঁটিচলছে ঠিক সেই সময়ে সেই বাড়িতেই ফিরে যেতে হচ্ছে বলে আলয়োশার মা খুশি নন।

আলয়োশার দাদামশাইয়ের সম্পত্তি বলতে ছিল একটা রঞ্জের কারখানা আৱ একটা বাড়ি আৱ কিছু জমানো টাকা। নিচু একতলা বাড়ি, ময়লা-ময়লা লালচে রঙ, জানলাগুলো ঠেলে বেরিয়ে এসেছে আৱ বাড়িৰ ছাদটা নিচু হয়ে এসে ছমড়ি খেয়ে পড়েছে জানলাগুলোৱে উপরে। ঘরগুলো ছোটো ছোটো আৱ অঙ্ককাৰ। উঠোনে রঞ্জগোলা বড়ো বড়ো গামলা। কোণেৰ একটা চালাঘৰে আগুন জলছে আৱ চিড়ি-বিড়ি শব্দে সেৰে হচ্ছে কী যেন।

দেখেওনে বাড়িটাকে আলয়োশার একেবারেই পছন্দ হলো না। তেমনি পছন্দ হলো না বাড়িৰ মাহুষগুলোকে।

ଆଲ୍‌ଯୋଶାର ଦାଦାମଶାଇ ଭାସିଲି ଭାସିଲିଯେଭିତରେ କଟା
ଚୋଥ, ଲାଲ ଦାଡ଼ି । ଆର ହାତେର ଚାମଡ଼ା ରଙ୍ଗେ ଖେଯେ ଖେଯେ
ଏମନ ଅବଶ୍ଵା ହେଁଛେ ଯେ ହାତଛୁଟୋକେ ରଙ୍ଗମାଖା ବଲେ ମନେ
ହୟ । ବାଡ଼ିର ବାଚ୍ଚାଗୁଲୋକେ ଧରେ ତିନି କାରଣେ ଅକାରଣେ ବେଦମ
ପ୍ରହାର ଦେନ । ଆର ଅଗ୍ନ ସମସ୍ତ ବିଷୟେ ତାର ଏତ ବେଶି ଥୁଁତ-
ଥୁଁତୋନି ଆର ଏମନ ବିଶ୍ରୀ ଶାସାନି ଯେ ପ୍ରଥମ ଦିନ ଥେକେଇ
ଆଲ୍‌ଯୋଶା ବୁଝାତେ ପାରଲ ଯେ ଏହି ଲୋକଟିଟି ତାର ସବଚେଯେ
ବଡ଼ୋ ଶକ୍ତି ।

ଓଦିକେ ମାମାରା ଦିନରାତ ନିଜେଦେର ମଧ୍ୟେ ଝଗଡ଼ା କରେ ।
କେଉ କାଉକେ ଦେଖିତେ ପାରେ ନା । ସର୍ଦାର କାରିଗର ଗ୍ରିଗରି
ଇଭାନୋଭିଚ ଆର ଶିକ୍ଷାନବିଶ ସିଗାନକ କାରୋ ସାତେ-ପାଂଚେ
ଥାକତେ ଚାଯ ନା । କିନ୍ତୁ ଏହି ଛୁଟ ନିରୌହ ମାନୁଷକେଓ ମାମାଦେର
ହାତେ ନିଗରି ଭୋଗ କରିବାକୁ ହେଁବାକୁ ହେଁବାକୁ ହେଁବାକୁ
ରେହାଇ ପାଇନା, ମାମାରା ତାଦେର ଓପରେ ପର୍ଯ୍ୟନ୍ତ ମାରପିଟ ଚାଲାଯ ।

ଏହି ବାଡ଼ିତେ ଆସାର କିଛୁଦିନେର ମଧ୍ୟେଇ ଆଲ୍‌ଯୋଶାକେ
ବେଦମ ପ୍ରହାର ଖେତେ ହଲୋ ଦାଦାମଶାଇଯେର ହାତେ । ଶେ ପର୍ଯ୍ୟନ୍ତ
ତାର ଜ୍ଞାନ ଛିଲ ନା ଏବଂ ତାରପରେଓ ବେଶ କିଛୁଦିନ ବିଛାନାୟ
ପଡ଼େ ଥାକତେ ହେଁଛିଲ ।

ଏହି ବିଛାନାୟ ପଡ଼େ ଥାକାର କରେକଟା ଦିନ ଆଲ୍‌ଯୋଶାର
ଜୀବନେ ଗଭୀର ଛାପ ଫେଲେଛେ । ମାନୁଷେର ବାଇରେ ଚେହାରାଟାଇ
ଯେ ସବ ନୟ, ଯେ-କୋନୋ ମାନୁଷକେଇ ଯେ ଆପନ ବଲେ କାହେ
ଟାନତେ ପାରା ଯାଯ - ଏହି ଶିକ୍ଷା ଆଲ୍‌ଯୋଶା ପେଯେଛିଲ ଏହି

সময়ে ।

বিছানায় শুয়ে শুয়ে একদিন আলয়োশা শোনে, তার মা
ও দিদিমাৰ মধ্যে কথা-কাটাকাটি হচ্ছে ।

দিদিমা বলেন, ছেলেটাকে মাৰতে মাৰতে অজ্ঞান কৰে
ফেললে, তবুও তুই ছিনিয়ে আনতে পাৱলি না ? ঝ্যা ?

—আমাৰ ভয় কৰছিল ।

—এত বড়ো হয়েও তোৱ ভয় কৰে ! ছি, ছি, ভাৱভাৱা !
আমি বুড়ি হয়েছি কিন্তু আমি ভয় পাইনি । ছি, ছি !

—আমাকে তোমৱা একটু রেহাই দাও মা । এসব
আমাৰ ভালো লাগে না ।

দিদিমা বলেন, ছেলেটাৰ জন্মে তোৱ একটুওভালোবাসা
বা দৰদ নেই । আহা, বাপ-মৱা অনাথ ছেলে !

যদ্রণাভৱা গলায় মা চেঁচিয়ে উঠেন, আমি নিজেও তো
একজন অনাধিনী । বাকি জীবনে আমাৰ আৱ কী আছে !

ঘৰেৱ কোণে ট্ৰাঙ্কেৱ উপৱে বসে দৃজনেই কাদেন ।

মা বলেন, আলয়োশা যদি না থাকত তাহলে আমি
এখানে থাকতাম না । অনেক দূৱে অন্য কোথাও চলে যেতাম ।
এই নৱকে আমি আৱ থাকতে পাৱি না । এই জায়গা
আমাৰ পক্ষে অসহ হয়ে উঠেছে, মা ! এখানে থাকবাৰ
মতো মনেৱ জোৱ আমাৰ নেই ।

দিদিমা ফিসফিস কৰে বলেন, আহা, বাছা বৈ আমাৰ !

আলয়োশাৰ মা তাৱপৱ আৱ বেশিদিন এই বাড়িতে

থাকেননি। কোথায় যেন বেড়াতে গিয়ে বহুদিন তিনি বাইরে
বাইরে কাটিয়ে আসেন। ফিরে এসে বিয়ে করেন আবার।
কিন্তু বিয়ে করেও তিনি সুখী হতে পারেননি।

আলয়োশার এই অসুখের সময় একদিন তাকে দেখতে
আসেন তার দাদামশাই। আর আলয়োশার বিছানার পাশে
বসে কত রকম গল্প যে বলেন তিনি! ছেলেবেলায় তিনি
ভল্গা নদীর ওপর দিয়ে বজরা টেনে নিয়ে যেতেন। জলের
ওপরে বজরা, তিনি ডাঙায় – খালি পায়ে ছুঁচলো পাথর
আর টিবি ডিঙিয়ে ডিঙিয়ে চলা। এইভাবে তিন-তিনবার
লম্বালম্বি ভল্গা নদী পাড়ি দিয়েছেন।

এই সময়ে শিক্ষানবিশ সিগানকের সঙ্গেও আলয়োশার
খুব ভাব হয়ে যায়। শক্তসমর্থ চেহারা ছেলেটির, চওড়া কাঁধ
মস্ত মাথা আর একমাথা কোঁকড়া কোঁকড়া কালো চুল।
পরনে মধু-রঙে সিল্কের শার্ট, পশমদার কাপড়ের টিলে
ট্রাউজার, পায়ে মশমশে বুটজুতো। মাথার চুল চকচক করে,
যন ভুরুর নিচে কৌতুকভরা চোখের দৃষ্টি, ঠোঁটের ওপরে সবে
কালো রেখা দেখা দিয়েছে। ঝকঝকে শাদা দাঁত।

সিগানককে আলয়োশা জিজ্ঞেস করে, দাদামশাই কি
আবার আমাকে মারবে নাকি রে?

সিগানক শাস্তিভাবে জবাব দেয়, ভাবছিস কী তুই?
আলবত মারবে। এবার থেকে মাঝে মাঝে এটা তোর কপালে
আছে খরে ঝাঁথ।

- ইস্মি, শুধু শুধু মারলেই হলো ?

- শুধু শুধু কেন হতে যাবে ? তোর দাদামশাই যে করে হোক, একটা না একটা ছুতো বার করে নিতে পারবে ।

আর হয়ও তাই । তারপর থেকে প্রায়ই কারণে অকারণে মার খেতে হয় আলয়োশাকে ।

দাদামশাই বলেন, ঢাখ, বাড়ির লোকরা যদি তোকে পিট্টি দেয় তবে সেটা তোর ভালোর জন্মেই । ওতে দোষের কিছু নেই । কিন্তু খবরদার, বাইরের লোককে কক্ষনো গায়ে হাত তুলতে দিবিনে ।

দাদামশাইয়ের এই একটি কথা আলয়োশা সারা জীবনে ভোলেনি ।

আর সিগানক ছেলেটা অন্তুত । দাদামশাই আলয়োশাকে প্রহার দিতে শুরু করলেই সে এগিয়ে এসে নিজের হাত বাড়িয়ে দিয়ে আলয়োশাকে বাঁচায় । আবার পরদিন নিজের ফুলে-ওঠা আঙুলগুলো আলয়োশার সামনে বাড়িয়ে দিয়ে নালিশ জানায়, দূর, দূর, তোকে আর আমি কোনো দিন বাঁচাতে চেষ্টা করব না । ঢাখ তো আমার কী অবস্থা হয়েছে ।

কিন্তু দেখা যায়, পরের বারেও নিজে কোনো দোষ না করেও আলয়োশার প্রাপ্য শাস্তি সে হাত পেতে নিচ্ছে ।

সিগানক ছিল কুড়িয়ে-পাঁওয়া ছেলে । জন্মের পরেই ওর মা ওকে রাস্তায় ফেলে চলে যায় । ওকে মানুষ করেন আলয়োশার দিদিমা । আলয়োশার দাদামশাই ওকে বিশেষ-

ভাবে পছন্দ করেন ওর হাত-সাফাইয়ের জন্যে। পাঁচ রুবল
দিয়ে ওকে বাজার করতে পাঠালে ও প্রায় পনেরো রুবলের
জিনিস নিয়ে ফিরে আসে। দিদিমা এজন্যে বকাবকি করেন
কিন্তু তাঁর একার কথায় কেউ কান দেয় না।

আলয়োশাকে দিদিমা প্রায়ই বলেন, আলয়োশা এ যেন
অঙ্ক বুড়ির হাতে বোনা একটা ফিতে। আগাগোড়া জট
পাকিয়ে গেছে, আসল নক্ষাটাকে কিছুতেই চেনা যাবে না।
ভেবে ঢাখ দেখি, একবার যদি ও চুরি করতে গিয়ে ধরা
পড়ে তাহলে মারতে মারতে ওকে খুন করে ফেলবে...

কিন্তু সিগানককে শেষ পর্যন্ত খুন হতে হয় আলয়োশার
মামাদের হাতে। সিগানককে তারা ছ-চোখে দেখতে পারত
না। শেষকালে একদিন সুযোগ পেয়ে আলয়োশার ছই মামা
চক্রান্ত করে সিগানককে খুন করে।

৩

আলয়োশা মামা বাড়িতে আসার পর এক বছরও কাটল না।
সম্পত্তি ভাগাভাগি হয়ে গেল। ইয়াকত-মামা রয়ে গেল
শহরে, মিখাইল-মামা গেল নদী পেরিয়ে। দাদামশাই
পলেভয় স্ট্রিটে একটি চমৎকার নতুন বাড়ি কিনলেন। বাড়ি-
টার দোতলায় ছিল একটা মদের দোকান আর ছাদের
ওপরে ভারি চমৎকার একটি ঘর। বাড়িটার সামনের দিকে
একটা বাগান, বাগান পেরিয়ে একটা পাহাড়ে খাদ। চার-
দিকে শাড়া শাড়া উইলো গাছ।

ছাদের ঘর থেকে বাইরের দিকে তাকালে চোখে পড়ে
একটা ধূলোভরা রাস্তা। বাঁ দিকে রাস্তাটা গিয়ে মিশেছে
অঙ্গোব্নায়া ক্ষেয়ারে। তার পাশে পুরোনো জেলখানা।
ডান দিকে রাস্তাটা গিয়ে মিশেছে সেনায়া ক্ষেয়ারে। তার
পাশে জেলকর্মচারীদের ব্যারাক। এই সেনায়া ক্ষেয়ারেই
সবুজ-শ্যাওলা-ঢাকা একটা পুরুর আছে। নাম, ছকত পুরুর।
দিদিমাৰ কাছে আলয়োশা গল্ল শুনেছে, এই ছকত পুরুরে
একবার তার বাবার জীবনান্ত হতে বসেছিল।

আলয়োশাৰ মা নতুন বাড়িতে আসার আগেই কোথায়
যেন চলে গেছেন। অনেক দিন পর-পর এক-একবার আসেন,
ছ-একদিন থেকেই আবার চলে যান।

ওদিকে দিদিমা পাড়াপড়শিদের সঙ্গে খুব ভাব জমিয়ে

নিয়েছেন। সমস্ত ব্যাপারে সবাই তাঁর কাছে আসে পরামর্শ নেবার জন্মে। আর আলয়োশা লেখাপড়া করতে শুরু করেছে। দাদামশাই তাকে স্নেহের বই থেকে অক্ষর চেনান। তবে মাঝে মাঝে এক একদিন পড়াতে পড়াতে বইপত্র ঠেলে সরিয়ে রেখে ভাঙ্গা ভাঙ্গা গলায় চিংকার করে ওঠেন: দাঢ় তোর মা-র কি একটুও দরদ নেই রে! নইলে এমন ছেলেকে ফেলে চলে যায়!

দিদিমা রাগ করেন: আবার এসব কথা কেন তুলছ! কিছু লাভ আছে!

কিন্তু এসব কথায় আলয়োশা বিশেষ কান দেয় না। তার মন পড়ে থাকে বাইরে।

শেষকালে এক সময়ে দাদামশাই বলেন, যা এবার বাইরে একটু খেলা কর গিয়ে। কিন্তু খবরদার রাস্তায় যাবি নে।

কে কার কথা শোনে! আলয়োশা একচুটে একেবারে উচু রাস্তার ওপরে। সঙ্গে সঙ্গে উলটো দিকের বোপবাড় থেকে ছেলের দল চিংকার করতে থাকে: টুস্কা! ওরেটুস্কা!

আলয়োশা কিন্তু রাগ করে না। শক্রবাহিনীকে তাক করে ইট ছুঁড়তে শুরু করে। শক্রর দলও সমান তৎপর। শুরু হয়ে যায় প্রচণ্ড এক লড়াই। ভারি মজা লাগে আলয়োশার।

এক-একদিন দাদামশাই পুরোনো দিনের সব গল্প বলতে শুরু করেন। সেই ১৮১২ সালের কথা। নেপোলিয়ন রাশ-

দেশ আক্রমণ করেছিল। বন্দী হয়েছিল অনেক ফরাসি সৈন্য। একদল বন্দী ফরাসিকে আটক রাখা হয়েছিল দাদামশাইদের গ্রামে। অন্তুত সব কাহিনী। দাদামশাই আজকাল কথায় কথায় আলয়োশাকে বেতমারা বন্ধ করেছেন। চোখের ওপরে নিজের ছেলেমেয়ের কাণ্ডকারখানা দেখে মাঝে মাঝে কেমন হতাশ হয়ে পড়েন তিনি আর নিজের ওপরেই রেগে ওঠেন।

— ছেলেমেয়েগুলো সব অপোগণ হয়েছে। একটাও যদি কোনো একটা দিকে ভালো হতো।

আপন মনেই বিড়বিড় করে চলেন আর দিদিমাকে শাসান : তোমার দোষেই ছেলেমেয়েগুলো উচ্ছমে গেছে !

তাকে যথাসাধ্য সাস্ত্রনা দিতে চেষ্টা করেন দিদিমা।

একদিন আলয়োশার চোখের ওপরে একটা কাণ্ড ঘটে গেল। এমনি এক উত্তেজনার সময়ে দিদিমা গিয়েছিলেন দাদামশাইকে শাস্ত করতে। হঠাৎ দাদামশাই ঘুরে দাঢ়িয়ে দিদিমার মুখের ওপরে দুম করে প্রচণ্ড একটা ঘৃষি মেরে বসলেন। ঝরঝর করে রক্ত পড়তে লাগল দিদিমার মুখ থেকে।

সেদিন রাত্রিবেলা বিছানায় শোবার পরেও কিছুতেই আলয়োশার চোখে ঘুম এল না। কী যেন একটা দলা পাকিয়ে গলার কাছে উঠে এসেছে। দম বন্ধ হয়ে আসছে যেন। বিছানা থেকে লাফিয়ে নেমে জানলার কাছে গিয়ে সে দাঢ়ায়। বাইরে জনশৃঙ্খ রাস্তা। অসহ এক যন্ত্রণায় বোবা হয়ে রাস্তার দিকে তাকিয়ে থাকে আলয়োশা।

এদিকে এক হলুস্কুল কাণ্ড।

মামাৰা সব আলাদা হয়ে গিয়েছিল। একদিন হঠাৎ ইয়াকভ-মামা এসে খবর দেয় যে মিখাইল-মামা নাকি মাতাল অবস্থায় আলয়োশার দাদামশাইকে খুন কৱতে আসছে।

তাৰপৰ সত্য-সত্যই মিখাইল-মামা এসে হাজিৰ। তবে একা এসেছিল, কাজেই অতগুলো লোকেৰ সঙ্গে এঁটে উঠতে পাৱে না। বেদম মাৰ খেয়ে ফিৰে যায়। কিন্তু তাৰপৰ থেকে আসতে শুন্দ কৱে দলবল নিয়ে। হাতেৱ সামনে যা কিছু পায় ভেজেচুৱে তচনছ কৱে দিয়ে চলে যায়। বন্ধ দৱজাৰ পিছন থেকে জানলাৰ ফাঁক দিয়ে আলয়োশার দাদামশাই শুধু অসহায়ভাবে তাকিয়ে দেখেন।

দেখতে দেখতে চারদিকে বাড়িটাৰ কুখ্যাতি ছড়িয়ে পড়ল। প্ৰায় প্ৰতি রবিবাৰ রাস্তাৰ ছেলেগুলো এই বাড়িৰ সামনে জড়ো হয়ে চিংকাৰ কৱেঃ ওৱে, আয় রে আয়, কাশিৱিনদেৱ বাড়িতে আবাৰ মাৰামাৰি শুন হয়েছে!

আলয়োশা কিন্তু ‘কাশিৱিন’ নয়, সে হচ্ছে ‘পেশকভ’। সুযোগ পেলেই এ-কথাটা সে সবাইকে শুনিয়ে রাখে। কেউ তাকে ‘কাশিৱিন’ বলে ডাকলে মাথায় রক্ত উঠে আসে তাৰ। পাড়াৰ ছেলেগুলোও তেমনি। আলয়োশাকে দেখতে পেলেই সবাই মিলে চিংকাৰ কৱতে থাকে:

— ওই আসছে রে ! কাশিরিন কিপটের নাতি আসছে :
ঢাখ ! ঢাখ !

— দে না ঘুষি মেরে ফেলে !

তারপরেই শুরু হয়ে যায় মারামারি । বয়সের তুলনায়
আলয়োশার গায়ে অস্বাভাবিক জোর, তাই শক্রপক্ষ একা
আসে না । দল বেঁধে এসে তাকে বেধড়ক মেবে যায় ।
আলয়োশা বাড়ি ফেরে কাটা নাক, কাটা ঠোঁট ও ছেঁড়া
জামাকাপড় নিয়ে ।

শুধু এইজন্মেই নয়, আরো নানা কারণে পাড়ার ছেলে-
দের সঙ্গে আলয়োশার মারামারি হয় । ওরা কুকুর আর
মোরগে লড়াই লাগিয়ে দেয়, ভেড়ার পালকে তাড়া করে,
রাস্তার পাগলের পিছনে লাগে । আর এইসব নিষ্ঠুরতা
আলয়োশা একেবারে বরদাস্ত করতে পারে না ।

আর এই রাস্তা দিয়েই মাঝে মাঝে গ্রিগরি ইভানোভিচ
ভিক্ষে করতে বেরোয় । দাদামশাইয়ের রঙের কারখানার
সর্দার কারিগর ছিল এই লোকটি । সারাটা জীবন মে পাত
করেছে এই কারখানাকে বড়ো করবার জন্মে । কিন্তু বুড়ো
বয়সে অঙ্ক হয়ে যাবার পর চাকরিগেছে তার । এখন রাস্তায়
রাস্তায় ভিক্ষে করে বেড়ানো ছাড়া গতি নেই । আলয়োশা
এই দৃশ্য কিছুতেই সহ্য করতে পারে না । ছুটে পালিয়ে
আসে দিদিমার কাছে আর জিজেস করে : দাদামশাই কেন
গ্রিগরির খাওয়া-থাকার বন্দোবস্ত করেন না ?

দাদামশাই ? থমকে দাঢ়িয়ে পড়ে দিদিমা বলেন, এই
আমি তোকে বলে রাখছি - মনে রাখিস কথাগুলো। কাজটা
ভালো হচ্ছে না। ভগবানের শাস্তি পেতে হবে এজন্যে।
অতি ভয়ংকর হবে সেই শাস্তি !

কথাটা অক্ষরে অক্ষরে ফলেছিল। তারপরে দশ বছরও
পার হয়নি। আলয়েশার দাদামশাইকেও ঠিক এমনিভাবে
রাস্তায় রাস্তায় ভিক্ষে করে বেড়াতে হয়েছিল।

পলেভয় স্ট্রিটের বাড়িতে দাদামশাটি মাত্র এক বছর ছিলেন। তারপরেই হঠাৎ মদের দোকানের মালিকের কাছে বিক্রি করে দিলেন বাড়িটা। নতুন আর-একটা বাড়ি কিনলেন কানাংনায়া স্ট্রিটে।

পুরোনো বাড়ির চেয়ে নতুন বাড়িটা আরো সুন্দর, আরো পরিপাটি, আরো চকচকে। সামনের দিকে ভারি সুন্দর বাগান। চারদিকে ঝোপঝাড়, লতাগুল্ম, দেবদারু ও লাইমগাছ। একটা কোণের দিকে ঢিল আগাছায় ভরা চওড়া একটা গর্ত। এই জায়গাটাকে পরিষ্কার করে আলয়োশা ভারি সুন্দর একটা কুঞ্জ তৈরি করেছিল।

নতুন বাড়িতে আসার পর তিনটি ঘটনা ঘটে। ‘বাঃ বেশ’ নামে একটি লোকের সঙ্গে আলয়োশার আলাপ হয়। আলয়োশার মা ফিরে আসেন। আলয়োশার বসন্ত হয় আর এই অস্ত্রখের সময়েই সে দিদিমার কাছে বাবার গল্প শোনে।

‘বাঃ বেশ’ লম্বা ও কুঁজো। কালো দাঢ়ি, ফ্যাকাশে মুখ, চোখে চশমা। আর আসল নাম কেউ জানে না, সবাই তাকে ডাকে ‘বাঃ বেশ’। তার কারণও আছে। ‘বাঃ বেশ’ কথাটা তার মুখে সব সময়ে শোনা যায়। হয়তো কেউ খাবার জন্মে ডাকতে এসেছে, সে বলবে ‘বাঃ বেশ’। যে যে-

কথাই বলুক না কেন, তার মুখে সেই এক জবাব - ‘বাঃ
বেশ’। শেষকালে তার নামই হয়ে গেল ‘বাঃ বেশ’।

বাড়ির পিছনদিকে রামাঘরের পাশে লম্বা একটি ঘর
ভাড়া নিয়ে সে থাকে। ঘরটা ঠাসা রয়েছে কাঠের বাক্স
আর মোটা মোটা বইয়ে। তাছাড়াও চারদিকে ছড়িয়ে
আছে নানা রঙের তরল পদার্থে ভর্তি বোতল, তামার
টুকরো, লোহা আর সীসের ঢাঁই। জানলার বাইরে থেকে
উকিবুঁকি দিয়ে আলয়োশা দেখে, কখনো সে সীসে গলাচ্ছে,
কখনো তামা ঝালাই করছে, কখনো খুদে খুদে নিক্ষিতে কী
যেন ওজন করছে। টেবিলের ওপরে সব সময়ে একটা
অ্যালকোহলের বাতি জ্বলে। দেখে দেখে ভারি কৌতুহল
হলো আলয়োশার।

শেষ পর্যন্ত বন্ধুত্ব হয়ে গেল দুজনের মধ্যে। ‘বাঃ বেশ’
একমনে নিজের কাজ করে আর আলয়োশা চুপ করে বসে
বসে দেখে।

একদিন আলয়োশা জিভেস করল, তুমি কী তৈরি
করছ ?

সে বলে, একটা জিনিস তৈরি করছি ভাইটি।

- কী জিনিস ?

- কী করে তোমাকে বলি ! তোমাকে ঠিক বোঝাতে
পারব না।

- দাদামশাই বলেন, তুমি নাকি জাল টাকা তৈরি

করো।

‘বাঃ বেশ’ হেসে গুঠে : একটা কথা মনে রেখো ভাইটি,
টাকা জিনিসটা এমন কিছু নয় যে তার জন্মে মাথা ঘামাতে
হবে।

কিন্তু ‘বাঃ বেশ’কে বাড়ির অন্ত কেউ পছন্দ করে না।
দাদামশাই নয়, দিদিমা নয়। সবারই ধারণা, লোকটার কিছু
একটা শয়তানি মতলব আছে। কিন্তু আলয়োশা যতই
তাকে দেখে ততই মুক্ষ হয়। এত বেশি সাধারণ জ্ঞান, চার-
পাশের ঘটনাকে এমন খুঁটিয়ে দেখার ক্ষমতা, আর মানুষের
ওপরে এত বেশি দরদ এর আগে আলয়োশা আর কারও
মধ্যে দেখেনি। আলয়োশা কিছুতেই ভেবে ঠিক করতে
পারে না, ‘বাঃ বেশ’কে কেন অন্ত সবার এত বেশি অপছন্দ।

শেষ পর্যন্ত তাকে এই বাড়ি থেকে তাড়িয়ে দেওয়া হয়।

একদিন সকালে আলয়োশা দেখে, ‘বাঃ বেশ’ নিজের
ঘরে মেঝের ওপরে বসে বাক্সের মধ্যে জিনিসপত্র গুচ্ছিয়ে
তুলছে।

— ভাইটি, এবার তাহলে বিদায় দাও। আমি চলে
যাচ্ছি।

আলয়োশার বুকের ভিতরটা যন্ত্রণায় কুঁকড়ে যেতে
থাকে।

— কেউ তোমাকে পছন্দ করে না কেন ?

কথাটা শুনে সে আলয়োশাকে জোরে বুকের ওপরে

চেপে ধরে। তার চোখের পাতাছটো কাঁপতে থাকে থরথর
করে। বলে, কেন জান ভাইটি? আমি অন্য কারো মতো
নই। অন্য কারো মতো নই আমি!

‘বাঃ বেশ’-এর সঙ্গে তারপরে আর আলয়োশার কোনো
দিন দেখা হয়নি। কিন্তু তার জীবনের এই প্রথম বন্ধুটির
কথা সে চিরকাল মনে রেখেছে।

‘বাঃ বেশ’ চলে যাবার কিছুদিন পরেই আলয়োশার মা
ফিরে আসেন। মা-র মুখটা যেন আরো ছোটো হয়ে গেছে,
আরো ফ্যাকাশে। চোখগুলো আরো বড়ো। চুলগুলো
আরো সোনালি। মা যেন এক ঝলক আলোর মতো। মা-র
সামনে এ-বাড়ির সব কিছুকেই মনে হচ্ছে পুরোনো আর
ময়লা। আর আলয়োশা নিজেও যেন দাদামশাইয়ের মতো
বুড়ো হয়ে গেছে।

মা বলেন, এবার তোকে স্কুলে ভর্তি করে দেব।

আলয়োশা বলে, লেখাপড়া তো আমি শিখেছি।

— আরো অনেক শিখতে হবে। ইস্ত, কী দস্তি হয়েছিস
রে তুই!

তারপরেই তিনি মহা উৎসাহে ছেলেকে লেখাপড়া
শেখাতে শুরু করেন। কিছুদিনের মধ্যেই ‘প্রথম পাঠ’ শেষ
হয়। কিন্তু মুশকিল বাধে কবিতা মুখস্থ করতে গিয়ে।
আলয়োশা কিছুতেই কবিতার লাইনগুলো ঠিকমতো মনে
রাখতে পারে না। কবিতা মুখস্থ বলতে গিয়ে কখন যে

আসল কবিতা ভুলে গিয়ে নিজের বানানো কবিতা বলতে
শুরু করে তা নিজেও টের পায় না ।

আলয়োশার মা ফিরে এসেছেন বলে দাদামশাই খুশি
নন । মাঝে মাঝে তিনি চেরা গলায় চিংকার করে ওঠেন :
তুই আমাদের মুখে চুনকালি দিয়েছিস ভারকা ! মা-ও যেন
কেমন মনমরা হয়ে থাকেন । তাঁর চোখের চারদিকে কালো
দাগ পড়ে । চেহারার দিকে আর আগেকার মতো নজর
থাকে না । চুল না আঁচড়ে একটা বোতামছেঁড়া জামা পরে
ঘুরে বেড়ান সারা দিন । মা-কে এমন বিশ্রি চেহারা নিয়ে ঘুরে
বেড়াতে দেখে ভারি খারাপ লাগে আলয়োশার । মা থাকবে
পরিষ্কার-পরিচ্ছন্ন ঝক্কাকে-তক্তকে সুন্দর সুন্দর পোশাক
পরে ! মা হবে এই পৃথিবীর মধ্যে সবচেয়ে সুন্দর মানুষ !

বড়োদিনের ছুটির পরে আলয়োশাকে আর মিথাইল-
মামার ছেলে সাশাকে স্কুলে ভর্তি করানো হলো । সাশা ছ-
তিন দিন স্কুলে যায়, তারপরেই স্কুল পালাতে শুরু করে ।
আলয়োশারও তাই ইচ্ছে । কিন্তু মা-র কথা ভেবে নিজের
মনের ইচ্ছাকে চেপে রাখে ।

সাশা মাঝেমাঝে বলে, কী হবে লেখাপড়া করে ? চলো
না দুজনে একসঙ্গে বাড়ি থেকে পালিয়ে কোনো একটা
ডাকাতদলের সঙ্গে যোগ দিই ।

আলয়োশা বলে, না ভাই, মা বলেছে, আমাকে বড়ো
হয়ে মস্ত অফিসার হতে হবে !

খানিকক্ষণ ভেবে নিয়ে সাশা তার কথায় সায় দেয় :
ঠিক আছে। তুই হবি অফিসার আৱ আমি হব ডাকাত-
দলের সর্দার। তারপৰ হয় তুই মৱবি, না হয় আমি মৱব।
কিংবা, হয় তুই ধৱা পড়বি, না হয় আমি ধৱা পড়ব। আমি
কিন্তু কিছুতেই তোকে খুন কৱতে পাৱব না।

আলয়োশা বলে, আমিও তোকে খুন কৱতে পাৱব না।

প্ৰত্যেকবাৱেই এভাৱে মতেৱ মিল হবাৱ পৱে ঢুজনেৱ
আলোচনা শেষ হয়।

তারপৰ একদিন সকালে আলয়োশাৰ সাৱা গা দিয়ে
লাল লাল গুটি বাৱ হলো। বুৰতে পাৱা গেল, আলয়োশাকে
বসন্তৱোগে ধৱেছে। চিলকোঠাৰ ঘৰে দীৰ্ঘকাল আটক
থাকতে হলো। তাকে।

এই অস্মুখেৱ সময়ে বাইৱেৱ লোকেৱ মধ্যে এক দিদিমাই
আসতেন। চামচ দিয়ে থাইয়ে দিতেন শিশুৰ মতো আৱ
অজ্ঞ গল্প ও রূপকথা বলতেন। এই সময়েই একদিন কথায়
কথায় দিদিম। বলতে শুনু কৱেন আলয়োশাৰ বাবাৰ গল্প।
কৃন্ধ আগ্ৰহ নিয়ে আলয়োশা শোনে।

আলয়োশাৰ বাবা ছিলেন এক সৈনিকেৰ ছেলে।
আলয়োশাৰ ঠাকুৰ্দা সাধাৱণ সৈনিক হিসেবে জীবন শুৱ
কৱে পৱে অফিসার হয়েছিলেন। কিন্তু কৰ্মচাৱীদেৱ ওপৱে
নিষ্ঠুৱ ব্যবহাৱ কৱাৱ অপৱাধে তাকে সাইবেৱিয়ায় নিৰ্বাসিত
কৱা হয়।

আলয়োশার বাবার ছেলেবেলাটা ছিল খুবই কষ্টের।
বাবার শাসন অসহ মনে হওয়ায় কয়েক বার তিনি পালিয়ে
গিয়েছিলেন বাড়ি থেকে। কিন্তু প্রত্যেকবারেই আলয়োশার
ঠাকুর্দা শিকারী কুকুর লেলিয়ে দিয়ে তাকে ধরে নিয়ে
এসেছেন আর নির্দয়ভাবে প্রহার করেছেন।

বাবার খুব ছোটো বয়সে ঠাকুমা মারা গেছেন আর
বাবার যখন ন-বছর বয়সে তখন ঠাকুর্দা মারা যান। বাবার
ধর্মবাপ পোষ্যপুত্র নেন তাকে। তিনি ছিলেন নিজে ছুতোর-
মিস্ত্রি এবং এই কাজে আলয়োশার বাবাকেও তিনি ওস্তাদ
করে তোলেন। ষোলো বছর বয়সে আলয়োশার বাবা
আসেন নিখনি-নভ্যোরোদে। তিনি যে কারখানায় কাজ
করতেন, সেটি ছিল কোতালিখা স্ট্রিটে আলয়োশার দাদা-
মশাইয়ের বাড়ির ঠিক পাশেই।

একদিন আলয়োশার দিদিমা আর মা বাগানে বেড়াচ্ছেন;
এমন সময়ে আলয়োশার দিদিমা দেখেন—একটি লোক
বাগানের বেড়া টপকে তাদের দিকে আসছে।

লোকটি বরাবর দিদিমার কাছে এসে হাঁটু মুড়ে বসে
বলে, আকুলিনা টভানোভনা, আমি আপনার মেয়ে
ভারিয়াকে বিয়ে করতে চাই।

এই লোকটিই হচ্ছেন আলয়োশার বাবা ম্যাঞ্চিম সাভা
তেয়েভিচ। আর ভারিয়া হচ্ছেন আলয়োশার মা।

আলয়োশার দাদামশাইয়ের এ বিয়েতে মত ছিল না।

তিনি যথাসাধ্য বাধা দেন। কিন্তু দিদিমা সহায় ছিলেন ;
তাই শেষ পর্যন্ত বিয়ে হয়ে যায়।

বিয়ের পরে নানা ঘটনায় প্রমাণ পাওয়া গেল, আলয়ো-
শার বাবা ম্যাঞ্জিম মানুষ হিসেবে খুবই খাটি। আলয়োশার
মামাদের মতো তিনি স্বার্থপর নন এবং খাওয়া-পরার জন্যে
নিজের আয়ের ওপরেই সম্পূর্ণভাবে নির্ভর করতে চান।

আলয়োশার মামারা নানা কারণে ম্যাঞ্জিমকে ছচেখে
দেখতে পারত না। শেষকালে একদিন ম্যাঞ্জিমকে মেরে
ফেলতে চেষ্টা করে। তখন শীতকাল, দুক্ত পুকুরের ওপরে
পুরু হয়ে বরফ জমে আছে। শুধু এক জায়গায় একটুখানি
ফাঁক ছিল। আলয়োশার মামারা করে কী, একসঙ্গে বেড়াতে
গিয়ে ম্যাঞ্জিমকে সেই ফাঁকের ভিতর দিয়ে ঠেলে ফেলে
দেয়। আর ম্যাঞ্জিম যতবার বরফের কিনার ধরে উঠতে চেষ্টা
করেন, ততবার তাঁর পায়ে লাথি মারে আর তাঁর মাথা
লক্ষ করে বরফ ছুঁড়তে থাকে। তারপর যখন মামাদের
ধারণা হয় যে ম্যাঞ্জিমের পক্ষে আর উঠে আসা সম্ভব হবে না
— তখন তাঁরা চলে যায়।

ম্যাঞ্জিম কিন্তু সেবার বেঁচে গিয়েছিলেন। ছ-হাতে ভর
দিয়ে কোনোরকমে বেরিয়ে আসেন জল থেকে। তারপর
পুলিশের সাহায্য নিয়ে সোজা বাড়িতে।

পুলিশের সার্জেণ্ট বারবার জিজ্ঞেস করে, আপনি
বলুন, কে আপনাকে ধাক্কা দিয়ে ফেলেছিল ? শান্ত স্বরে

ম্যাঞ্জিম জবাব দেন, কেউ না ! অঙ্ককারে রাস্তা ঠাহর করতে
না পেরে আমি নিজেই পড়ে গেছি ।

ম্যাঞ্জিম যখন বাড়ি ফিরে এসেছিলেন তখন তাঁকে
দেখে আলয়োশার মা আর দিদিমা চিনতে পারেননি । সারা
শরীর নীল হয়ে গেছে, হাতের আঙুলগুলো থ্যাংলানো—
রক্ত গড়িয়ে গড়িয়ে পড়ছে । মাথার ওপরে শাদা শাদা
বরফের মতো কী লেগে আছে যেন, কিন্তু সেগুলো কিছুতেই
গলে পড়ছে না । পরে বোধা যায় যে গুগুলো তাঁর মাথার
চুল । কয়েক ঘণ্টার মধ্যে একমাত্র কালো চুল একেবারে
শাদা হয়ে গিয়েছিল ।

তারপর সাত সপ্তাহ ম্যাঞ্জিম বিছানা ছেড়ে উঠতে
পারেননি । বিছানায় শুয়ে শুয়ে খালি কাঁদতেন আর
বলতেন, ওরা কেন আমার সঙ্গে এমন শক্রতা করল ? ওদের
কাছে আমি কী অপরাধ করেছি ।

সুস্থ হয়ে ঠার পরেই তিনি নিব্বন্ধ গোরোদ ছেড়ে
আস্ত্রাখানে চলে যান এবং মৃতুর দিন পর্যন্ত সেখানেই ছিলেন ।
নিব্বন্ধ গোরোদে থাকার সময়ে ১৮৬৮ সালে আলয়োশার
জন্ম হয়েছিল ।

বসন্তরোগ থেকে সেরে উঠবার পরে প্রথম যেদিন আলয়োশা
নিচে নামতে পারে, সেদিনই তাকে এক মর্মান্তিক খবর
শুনতে হয়।

আলয়োশার মা আবার বিয়ে করছেন।

তারি মন খারাপ হয়ে ধায় আলয়োশার। লোকজনের
সঙ্গ ভালো লাগে না। একা একাই কাটিয়ে দেয় সারাদিন।
এই সময়েই সে বাগানের একটা পোড়ো জায়গায় নিজের
জন্মে তারি সুন্দর একটা কুঞ্জ তৈরি করেছিল। মাঝে মাঝে
ইচ্ছে হতো, মা-কে গিয়ে বলে, মা তুমি বিয়ে কোরো না।
আমি কাজ করে তোমার খাওয়া-পরার ব্যবস্থা করে দেব।

কিন্তু মা-র মুখের দিকে তাকিয়ে শেষ পর্যন্ত আর কিছুই
বলা হলো না। মা-র বিয়ে হয়ে গেল।

বিয়ের পরেই আলয়োশার মা আর সৎ-বাপ চলে
গেলেন মন্ত্রোত্তে। যাবার আগে আলয়োশাকে মা বললেন,
আমরা শিগগিরই ফিরে আসব। তোর বাবা পড়াশুনো শেষ
করে পরীক্ষায় পাশ করতে পারলেই ফিরে আসব।

কথাটা শুনে তারি অবাক লাগল আলয়োশার। যে-
লোকের দাঢ়ি গজিয়ে গেছে তার আবার পড়াশুনো কী!

সকলের কাছ থেকে বিদায় নিয়ে চলে গেলেন আলয়ো-
শার মা আর সৎ-বাপ। দিদিমা দাঢ়িয়ে দাঢ়িয়ে কাঁদতে

লাগলেন। শুধু দাদামশাই চোখের জল মুছে বিড়বিড় করে বললেন, তালো হবে না...এ বিয়ের ফল কক্ষনো তালো হবে না...

কানাংনারা স্ট্রিটের বাড়িতে এক বছরও কাটল না। দাদামশাই আবার বাড়িটা বিক্রি করে দিলেন। একদিন সকালবেলা চায়ের টেবিলে বসে দিদিমার কাছে ঘোষণা করলেন খবরটা। বললেন, গিন্নি, তোমার থাওয়া-থাকার ব্যবস্থা এতদিন আমিই করেছি। কিন্তু আমার পক্ষে আর সন্তুষ্য নয়। এবার থেকে নিজের ব্যবস্থা! নিজেকেই করে নিতে হবে।

অবিচলিত স্বরে দিদিমাজবাব দিলেন, ঠিক আছে। তাই হবে।

একটা বন্ধ গলির মধ্যে পুরোনো এক বাড়ির একতলার ছুটি অঙ্ককার ঘর ভাড়া নিলেন দাদামশাই। বাড়ির অধিকাংশ আসবাব বিক্রি করে দেওয়া হলো।

নতুন বাড়িতে আসার কিছুদিন পরেই আলয়োশার মা আর সৎ-বাপ ফিরে এলেন। আস্তে আস্তে জানা গেল আলয়োশার সৎ-বাপ জুয়া খেলে সমস্ত টাকা উড়িয়েছেন। এখন তাঁদের একেবারে নিঃস্ব অবস্থা।

তারপরে অবশ্য আলয়োশার সৎ-বাপ চাকরি পেয়ে ছিলেন। কিন্তু কোনো চাকরিই তিনি রাখতে পারেননি। নিজের বদ খেয়ালের জন্যে বারবার তাঁকে চাকরি খোয়াতে

হয়েছে ।

দ্বিতীয়বার বিয়ের পর আলয়োশার মা আর মাত্র ছুটি
বছর বেঁচে ছিলেন । ছু-বছরে আলয়োশার ছুটি ভাই হয় ।
ছুজনেই এক বছর বয়েস পুরো হ্বার আগেই মারা গেছে ।

শেষদিকে আলয়োশার মা-র ওপরে আলয়োশার সৎ-
বাপ ভয়ানক দুর্ব্যবহার করতেন । আলয়োশার মনে আছে,
একদিন কী একটা ব্যাপার নিয়ে কথা কাটাকাটি হ্বার পরে
আলয়োশার সৎ-বাপ আলয়োশার মাকে মেরেছিলেন ।
সেদিন আর আলয়োশা নিজেকে সামলাতে পারেনি ।
টেবিলের ওপর থেকে একটা ছুরি তুলে নিয়ে সৎ-বাপকে
লক্ষ করে ছুরি চালিয়েছিল । অন্নের জন্যে তিনি বেঁচে
গিয়েছিলেন ।

স্কুলের লেখাপড়া আলয়োশার যেটুকু হয়েছে - তাও
এই ছু-বছরের মধ্যেই । আলয়োশাকে স্কুলে ভর্তি করিয়ে
দিয়েছিলেন আলয়োশার মা ।

অন্তুত সাজপোশাকে স্কুলে যেতে হতো আলয়োশাকে ।
পায়ে থাকত মা-র একজোড়া জুতো, পরনে দিদিমার
ব্লাউজের কাপড় কেটে তৈরি কোট, হলদে শার্ট আর লম্বা
ট্রাউজার । এই অন্তুত সাজপোশাকের জন্যে ছেলেরা ওকে
খেপাত আর ওর নাম রেখেছিল - রুইতনের টেকা ।

স্কুলে আলয়োশার দৌরান্ধ্যেরও শেষ ছিল না । এজন্যে
মাস্টারমশাইদের কম নাকাল হতে হয়নি ।

বাইবেলের মাস্টারমশাই ক্লাসে চুকেই আলয়োশাকে
জিজেস করতেন, পেশ কভ তুমি বই এনেছ কি আননি ?
হ্যা, বই ।

মাস্টারমশাইয়ের কথা বলার ভঙ্গি নকল করে আলয়োশা
জবাব দিত, না আননি, হ্যা ।

— হ্যা মানে !

— না ।

— যাও, বেরিয়ে যাও ক্লাশ থেকে !

আলয়োশাকে স্কুল থেকে তাড়িয়ে দেওয়া হবে ঠিক করা
হয়েছিল । কিন্তু এক বিশপের চোখ পড়ে যায় তার ওপরে ।
তিনি স্কুলের গোলমাল মিটিয়ে দিয়ে যান ।

‘বাইবেলের গল্ল’ বইটা কেনবার জন্যে আলয়োশা
একদিন মা-র তহবিল থেকে একটা ঝুঁক চুরি করে বসে ।
সেই ঝুঁকটা দিয়ে ‘বাইবেলের গল্ল’ ছাড়াও আরো ছুটি বই
কেনে সে । একটি হচ্ছে ‘রবিনসন ক্রসো’ এবং অপরটি
‘অ্যাণ্ডারসনের ঝুঁকথা’ । পরদিন স্কুলে এসে টিফিনের
সময় সকলে মিলে ঝুঁকথার বইটি পড়তে শুরু করে ।
‘নাইটিংগেল’ নামে একটা গল্লের শুরুটা ছিল এই ঝুকম :
চীন দেশে সব মানুষই চীনা, এমনকী সেখানকার স্ন্যাটও
চীনা । এই এক লাইন পড়েই আলয়োশা মুগ্ধ হয়ে গিয়ে-
।

এদিকে আলয়োশার দাদামশাই ও দিদিমা এক অনুত্ত

জীবন কাটাচ্ছেন। চায়ের পাতা থেকে শুরু করে ঠাকুরের আসনের তেলটুকুর খরচ পর্যন্ত দুজনকে ভাগাভাগি করে চালাতে হয়।

হয়তো চায়ের পাতা ভেজানো হয়েছে। দাদামশাই বলে ওঠেন, আরে রোসো রোসো দেখি কতটা চা ভিজিয়েছ ?

তারপর চায়ের পাতাগুলো হাতের ওপর নিয়ে খুব সাবধানে একটি একটি করে পাতাগুলো গুনতে থাকেন। একই পাত্রে চা ভেজানো হয় বটে কিন্তু দুজনের চায়ের ভাগ যাতে সমান থাকে সেদিকে কড়া নজর রাখেন তিনি।

সৎ-বাপকে ছুরি নিয়ে তাড়া করার পর আলয়োশাকে মা-র কাছ থেকে চলে আসতে হয়েছে এ-বাড়িতে। এখানে এসে সে রোজগার করতে শুরু করে। রবিবার ভোরবেলা আর অন্যান্য দিন স্কুলছুটির পরে বেরিয়ে পড়ে একটা থলে নিয়ে। রাস্তায় রাস্তায় ঘুরে হাড়ের টুকরো, ছেঁড়া শ্বাকড়া, পেরেক ও কাগজ কুড়োয়। আধমণ ছেঁড়া শ্বাকড়ার বদলে পাওয়া যায় কুড়ি কোপেক, আধমণ হাড়ের টুকরোর বদলে দশ কোপেক। মাঝে মাঝে ‘বালুচ’ নামে একটা দীপে সদলে অভিযান হয়। সেখানে কাঠের শুদাম আছে; পাহাড়া-শুলাদের চোখকে ফাঁকি দিয়ে কাঠ ছুরি করে আনে।

সে-সময়ে ছোটোখাটো ছুরিকে কেউ দোষের বলে মনে করত না। এমনকী বড়োদের চোখের ওপরেই বাচ্চারা লোকের পকেট কাটত। বড়োরাও স্বয়েগ-স্ববিধা পেলেই

অপৰের জিনিস তুলে নিয়ে আসত বাড়িতে। তারপরে, এসব কাজে কে কতটা কৃতিহ দেখাতে পেরেছে তাই নিয়ে বড়াই করত নিজেদের মধ্যে।

আলয়োশার দাদামশাইয়ের অবস্থা ক্রমেই খারাপ হচ্ছে। যতই তিনি টানাটানির মধ্যে পড়ছেন – ততই নানা ব্যাপারে তাঁর নীচতা ও স্বার্থপরতা প্রকাশ পাচ্ছে।

কিছুদিন পরে আলয়োশায় সৎ-বাপ চাকরি খুইয়ে কোথায় যেন চলে যান। কোলের বাচ্চাটিকে নিয়ে আলয়োশার মা আবার চলে আসেন দাদামশাইয়ের বাড়িতে।

এই দাদামশাইয়ের বাড়িতেই আগস্ট মাসের এক রবিবারের ছপুরে আলয়োশার মা-র মৃত্যু হয়। আর মা মারা যাবার কয়েকদিন পরেই দাদামশাই আলয়োশাকে ডেকে বলেন :

— শোনো আলেক্সি, তোমাকে এভাবে মেডেলের মতো আমি গলায় ঝুলিয়ে রাখব তা তো আর চলতে পারে না। এখানে আর তোমার জায়গা হবে না। এবার তোমার বাইরের ছনিয়াকে চিনে নেবার সময় হয়েছে।

দশ বছরের ছেলে আলয়োশা স্কুলের লেখাপড়া চুকিয়ে দিয়ে বেরিয়ে পড়ল বাইরের ছনিয়াকে চিনে নেবার জন্যে।

অ্যালক্সি ম্যাঞ্জিমোভিচ পেশ্কভের শৈশব-জীবন এই দশ বছর বয়সেই শেষ। এর পর তাকে আলয়োশা বলে ডাকবার আর কেউ নেই। কেউ ডাকে পেশ্কভ, কেউ ডাকে আলেক্সি। আর সেই ডাকের মধ্যেও এতটুকু স্নেহ বা ভালোবাসা থাকে না। তারি রুক্ষ আর তারি নির্মম মনে হতে থাকে পৃথিবীটাকে।

দশ থেকে পনেরো – আলেক্সির জীবনের এই পাঁচ বছর কেটেছিল নানা কাজে শিক্ষানবিশি করে।

প্রথমে এক জুতোর দোকানে ফাইফরমাস খাটার কাজ। আলেক্সির সেই মামাতো ভাই সাশা শেষ পর্যন্ত ডাকাত-দলের সর্দার না হয়ে এই জুতোর দোকানেই কাজ নিয়েছিল। সে যে প্রতিজ্ঞা করেছিল যে ডাকাত-দলের সর্দার হতে পারলেও সে আলেক্সিকে প্রাণে মারবে না – সে-কথা এতদিনে বোধ হয় ভুলে গেছে। সামান্য জুতোর দোকানের সহকারী হতে পেরেই সে আলেক্সির জীবনকে একেবারে অতিষ্ঠ করে তোলে। তার ওপরে আছে দোকানের মালিক। এই লোকটির কথা বলার ধরণ এত খারাপ যে আলেক্সির কাছে অসহ্য মনে হতে থাকে। তবুও সে অপেক্ষা করেছিল যে দোকানের মালিক হয়তো নিজের থেকেই তার সামান্য একটা কিছু দোষের জন্মে তাকে চাকরি থেকে তাড়িয়ে

দেবে। কিন্তু সে শেষ পর্যন্ত নিজেই চাকরি ছেড়ে দিয়ে চলে আসে। একদিন সে সূপ গরম করছিল; হঠাৎ পাত্রটা উলটে গিয়ে তার হাতছচো পুড়ে গেল। সঙ্গে সঙ্গে হাসপাতালে পাঠানো হলো তাকে। হাসপাতাল থেকে বেরিয়ে সে আর দোকানে ফিরে যায়নি।

তারপর তাকে নকশা আঁকার কাজ শিখবার জন্যে আসতে হলো এক দূর সম্পর্কের আত্মীয়ের কাছে। এটি আত্মীয়টির নাম ভিক্টর সার্গেয়েভ। বৌ ও মা-কে নিয়ে সে থাকে। এটি ছুটি স্ত্রীলোকের মধ্যে মোটেও বনিবনা নেই। বোজই তুচ্ছ সব খুঁটিনাটি ব্যাপার নিয়ে ঝগড়া বেধে যায় ছজনের মধ্যে। তবে একটা বিষয়ে ছজনের মধ্যে খুবই মিল। তা হচ্ছে আলেক্সিকে গাধার মতো খাটিয়ে নেওয়া। একটা মিনিট সে সুস্থির হয়ে বসতে পারে না। সংসারের শমস্ত কাজ তাকে দিয়ে করানো হয় এবং তারপরেও অকারণে ধমক খেতে হয় ছজনের কাছে। ছজনেই তাকে খুব ভালো-ভাবে বুঝিয়ে দিতে চেষ্টা করে যে সে হচ্ছে বাড়ির চাকর মাত্র আর তারা ছজনেই তাই মনিব।

ইঁছুর যেমন সুযোগ পেলেই খাঁচা ছেড়ে পালিয়ে যায় তেমনি আলেক্সিও একদিন এই বাড়ি ছেড়ে বেরিয়ে পড়ে রাস্তায়।

কয়েকদিন কাটে নিবন্ধনভূগোরোদের রাস্তায় রাস্তায়। জাহাজ-ঘাটায় এসে জাহাজিদের পিছনে ঘূরঘূর করে।

শেষকালে কাজ ভুট্টে যায় একটা। ‘দোত্রি’ নামে একটা স্থিমবোটে বাসন ধোয়ার কাজ। আলেক্সির মনে হয়, এতদিনে একটা মনের মতো কাজ পাওয়া গেছে।

কিন্তু তার মনের এই ভাব বেশিদিন থাকে না। ‘দোত্রি’ স্থিমবোটে কয়েদিদের চালান দেওয়া হয়। কিছুদিনের মধ্যেই সে বুঝতে পারে যে সে নিজেও একজন কয়েদি ছাড়। কিছু নয়। তোর থেকে শুরু করে অনেক রাত পর্যন্ত একটুও বিশ্রাম পায় না, রাশি রাশি থালা আর বাটি মাজতে হয় তাকে, রাশি রাশি চামচ আর ডিস পরিষ্কার করতে হয়।

তবুও একাজ তার ভালো লাগে।

ডেকে দাঢ়িয়ে সামনের দিকে তাকালে দেখা যায় নদীর স্থির জল, অরণ্যের নীল রেখা, দিগন্তপ্রসারিত মাঠ আর ছোটো ছোটো গ্রাম। মনে হয়, মন্ত পৃথিবীটা যেন হাতের মুঠোয় এসে ধরা দিয়েছে।

মনে পড়ে, অনেক বছর আগে আরেকবার স্থিমারে চেপে আস্ত্রাখান থেকে নিঝি-নি-নভি গোরোদে গিয়েছিল ! মনে পড়ে দিদিমার কথা। মনে পড়ে দাদামশাইয়ের বাড়িতে থাকার সময়ে বনেজঙ্গলে ঘুরে ঘুরে পাখি ধরার কথা।

এসব কথা এত ভীষণভাবে মনে পড়ে যে শেষ পর্যন্ত একদিন আলেক্সি এই বাসন-ধোয়ার চাকরি ছেড়ে দিয়ে আবার ফিরে আসে তার দিদিমার কাছে। তারপর থেকে তার কাজই হয় একটা জাল হাতে নিয়ে বনেজঙ্গলে ধোয়া

আর পাখি ধৰা। ঝাঁকে ঝাঁকে পাখি ধৰে আনে আলেক্সি,
আর দিদিমা সেই পাখিগুলোকে বিক্ৰি কৰে আসেন।

কিন্তু গ্ৰীষ্মকাল শেষ হতেই পাখিৰ দল উড়ে চলে গেল
অন্ত দেশে। বাধা হয়ে আলেক্সিকে আবাৰ বেৰোতে হলো
কাজেৰ সন্ধানে। আবাৰ শুৱ হলো সেই ছঃসহ বন্দীজীবন।

কিন্তু ইতিমধ্যে আলেক্সি নতুন এক জগতেৰ সন্ধান
পেয়ে গেছে। সে জগৎ হচ্ছে বইয়েৰ জগৎ। ঢেলেবেলায়
অ্যাণ্ডারসনেৰ রূপকথা পড়ে একদিন সে মুঞ্চ হয়েছিল—
তাৰপৰ থেকে বইয়েৰ পৃষ্ঠা উলটে দেখবাৰ অবসৱ আৱ
পায়নি। কিন্তু ‘দোত্ৰি’ স্থিমৰোটে কাজ কৱাৰ সময় হঠাৎ এক
ট্ৰাঙ্কভৰ্তি বইয়েৰ সন্ধান পেয়ে গেল। বইগুলোৱ নামও যেমন
অনুত্ত, লেখাও তেমনি। কিন্তু সেই হাড়ভাঙা খাটুনিৰ মধ্যেও
সময় কৱে নিয়ে আলেক্সি সবকটা বই পড়েছিল।

তাৰপৱেই একটা নেশা ধৰে যায়। যেখান থেকে পাৱে
বই জোগাড় কৱতে শুৱ কৱে। হাতেৰ সামনে যা পায় তাই
পড়ে। এইভাবেই সে বালজাক ও ফ্লবেয়াৰ, পুশ্কিন ও
গোগোল, তুর্গেনেভ ও লেৱমন্তভ—ফ্ৰাসি ও রুশ দেশেৰ
বিখ্যাত সব লেখকদেৱ সঙ্গে পৱিচিত হলো।

মনে আছে, অনেক দিন আগেকাৱ এক উৎসবেৰ দিনেৰ
কথা। তাকে হাজিৰ হতে হয়েছিল গিৰ্জাৰ এক পাদ্ৰিৰ
সামনে নিজেৰ পাপ নিজেৰ মুখে স্বীকাৰ কৱিবাৰ জত্তে।

পাদ্ৰি জিজেস কৱেছিলেন, শুৱজনদেৱ কথা তুমি মেনে

চলো ?

আলেক্সি বলল, না ।

— না বলে পরের জিনিস নাও ?

— নিই ।

— খেলায় বাজি রেখে পয়সার অপচয় করো ?

— করি ।

ভীষণ রেগে গিয়ে পাদরি বললেন, নরকেও স্থান হবে
না তোমার ! তারপর হঠাৎ জিজেস করলেন, গোপন
ইস্তাহার টিস্তাহার কথনো পড়েছ ?

— আজ্ঞে ?

— বলি, বেআইনি বই পড়েছ কথনো ?

— না পড়িনি ।

— যাও, তোমার সমস্ত অপরাধ মাপ হয়ে গেল ।

সেদিন থেকে বেআইনি বইয়ের ওপরে আলেক্সির
ভীষণ আগ্রহ । দু-একজনকে জিজেস করে, কোথায় গেলে
এইসব বই পাওয়া যায় । কেউ তাকে কিছু বলতে পারে না ।

একদিন একটা পত্রিকার পৃষ্ঠায় চেকভের লেখা একটা
গল্প পড়ে আলেক্সির মন ভীষণভাবে নাড়া খেল । তাবল,
মানুষের মনের কথাকে টেনে বার করে এমন সুন্দর ভাবে
গল্প লেখা যায় ! কেন জানি বারবার মনে হতে লাগল,
তারও অনেক কিছু কথা বলার আছে ! চেষ্টা করলে সেও
এমনি ভাবে লিখতে পারে ।

একদিন আলেক্সি এক মেলায় বেড়াতে গিয়েছিল। সেখানে শ্চিদ্রনের লেখা একটা নাটকের অভিনয় দেখল। দেখে মুঝ হল। নাটক শেষ হবার পরেও কেমন একটা আচ্ছন্ন অবস্থায় সারা রাত ঘুরে বেড়াল মাঠে মাঠে। সেই অবস্থায় সে গিয়ে পড়ে এক মাতালের হাতে। মাতালটা তাকে ধরে মারে, সে কিন্তু জ্ঞানেপও করে না।

এই ঘটনার কিছুদিন পরে আলেক্সি একটা থিয়েটারে কাজ পেয়েছিল। সেখানে গিয়ে টের পায়, বাইরে থেকে অভিনেতা অভিনেত্রীদের দেখে যা মনে হয় — আসলে তারা মোটেই তা নয়। শুধু অভিনয়ের সময়টুকু বাদ দিলে, তাদের যেমন বিশ্রী কথাবার্তা, তেমনি বিশ্রী চালচলন। আর থিয়েটারের মালিক সবার সঙ্গে চাকরের মতো ব্যবহার করে। থিয়েটারের কাজে আলেক্সি বেশিদিন টিকে থাকতে পারেনি।

তারপরেই সে ঠিক করে, সে আবার পড়াশুনো করবে। আর মনের এই ইচ্ছেটুকু শুধু সম্বল করে পনেরো বছরের কিশোর ছেলেটি রওনা হয় কাজান শহরের দিকে। সেখানে নাকি মস্ত বিশ্ববিদ্যালয় আছে।

কাজান শহরে এসে সম্পূর্ণ নতুন ধরণের এক বিশ্ববিদ্যালয়ে
আলেক্সিকে লেখাপড়া শিখতে হয়েছিল। চার-দেওয়াল-ঘেরা
ডেস্ক-বেঞ্চি-সাজানো ক্লাশৱর সেট। তা হচ্ছে শহর-
তলির জীর্ণ বস্তি আর জাহাজঘাটার মালঠাস। জেটি।
সেখানকার মানুষগুলোও অন্য ধরণের। গুপ্ত রাজনৈতিক
দল, বাপ মা-খেদানো রাস্তার ছেলে, পুলিশ, ছাত্র ও বিপ্লবী-
দের নিয়ে সে এক বিচিত্র জগৎ। জাহাজঘাটায় আলেক্সির
একটা কাজ জুটে গেল। কুড়ি কোপেক রোজ।

এই বিচিত্র জগতে এসে যাদের সঙ্গে আলেক্সির
পরিচয় হল তারা কেউ জাহাজি, কেউ পকেটমার, কেউ
ভিথিরি। এদের মধ্যে কেউ ছিল বিশ্ববিদ্যালয়ের ছাত্র, কেউ
ছিল বড়ো চাকুরে। এখন সবাই এক। একসঙ্গে চুরি করে,
একসঙ্গে মারামারি করে, একসঙ্গে ঘুরে বেড়ায়। কিন্তু ছোটো
কাজ করলেও মানুষগুলোর মন ছোটো নয়। নিজেরা খেতে
পায় না কিন্তু তবুও অন্য মানুষকে সাহায্য করে। মানুষের
ওপরে তাদের অন্তুত দরদ।

শহরতলির ছোট এক দোকানের মালিক আন্দেই
দেরেনকভ। তার সঙ্গে পরিচয় হয়ে গেল আলেক্সির।
বাইরে থেকে দেরেনভের দোকানটা দেখতে অতি নিরীহ।
তাকের ওপরে সাজানো আছে চিনি, মোমবাতি, মিষ্টি আর

সাবান। কিন্তু এই দোকানেরই ভিতরের দিকের একটা ঘরে
লুকোনো আছে অজস্র বেআইনি বই। দেরেনকভ আসলে
একজন বিপ্লবী। বিপ্লবের কাজে সাহায্য হবে বলেই সে এই
দোকান করেছে।

এতদিন ধরে আলেক্সি শুধু গল্প আর উপন্যাসই পড়ে
এসেছে। এই প্রথম অন্য ধরণের বইয়ের সঙ্গে পরিচয়।
বৈজ্ঞানিকদের লেখা বই, চিন্তাশীলদের লেখা বই, দেশকে
যারা নতুনভাবে গড়ে তুলতে চায় তাদের লেখা বই। হাতে
স্বর্গ পেল আলেক্সি।

দেরেনকভের দোকানে যাতায়াত শুরু হবার পরেই
গুপ্ত ছাত্রসমিতির সংস্পর্শে এসে গেল সে। এই সমিতির
ছাত্রা ইতিহাস ও অর্থনীতির বই পড়ে আর তা নিয়ে
আলোচনা করে। রুশদেশে কী করে একটা বিপ্লব করা যায়
— এই ছিল তাদের একমাত্র চিন্তা। আলেক্সির মনেও
এদের চিন্তার ছোয়াচ লাগল।

বিশ্ববিদ্যালয়ের চার-দেওয়াল-ঘেরা ক্লাশঘরে যে শিক্ষা
সে কোনোদিনই পেত না — সেই শিক্ষাই সে পেল এই নতুন
বিশ্ববিদ্যালয়ে।

এইভাবে নতুন নতুন লোকের সঙ্গে আলাপ করে আর
নতুন নতুন বই পড়ে দিন কাটছিল আলেক্সির। তারপর
শরৎকাল আসতেই জাহাজঘাটা থেকে একে একে সমস্ত
ষিমার ও জাহাজ চলে গেল। সামনে শীতকাল। এইজাহাজ-

ষাটায় একটিও স্থিমার বা জাহাজ আসবে না। আলেক্সি
আবার বেকার।

কপর্দকশূন্য অবস্থায় সে রাস্তায় রাস্তায় ঘুরে বেড়ায়।
মাথা গুঁজবার ঠাঁই নেই, খাবার কিনবার পয়সা নেই।
কোথাও হয়তো-বা একটা নৌকোকে উলটে রাখা হয়েছে
তারই তলায় শুয়ে রাত কাটায়। দিনের পর দিন না খেয়ে
থাকে।

শেষকালে অনেক চেষ্টাচরিত্র করে এক ঝুঁটির কারখানায়
কাজ পেল আলেক্সি। মাসে তিনি ঝুঁটি মাটিনে। কিন্তু
আলেক্সি তাতেই রাজি। তবু তো মাথা গুঁজবার একটু
জায়গা পাওয়া যাবে! বাইরে পড়ে থেকে শীতে জমে যাওয়ার
চেয়ে তো ভালো!

কারখানার মালিকের নাম সেমিয়োনভ। হোদল-কুঁ-
কুঁতের মতো চেহারা। সারাদিন কাঁড়ি কাঁড়ি মদ গেলে আর
উঠেনময় দাপাদাপি করে বেড়ায়। কিন্তু একদিকে তার
টনটনে ছঁশ! কারখানার শ্রমিকদের পশুর মতো খাটিয়ে
নিতে পারে সে।

কিন্তু আলেক্সি অবাক হয়ে দেখল যে শরীরের রক্ত
জল করে পশুর মতো খাটার পরেও শ্রমিকরা মালিকের
গুণকীর্তন করে। তাদের যে অন্ত্যায়ভাবে শোষণ করা হচ্ছে
সেই জ্ঞানটুকু পর্যন্ত তাদের নেই।

সতেরো বছর বয়সের মধ্যেই আলেক্সি অনেক কিছু

দেখেছে, অনেক বই পড়েছে। সে চুপ করে রইল না। শ্রমিকদের বোকাতে শুরু করল, দিনে চোদ্দ ঘণ্টা খেটেও কেন তারা খেতে পরতে পায় না, আর কী করলে পরে এই অবস্থার প্রতিকার হতে পারে। আর নিজের কাজের জায়গায় এমনভাবে সে একটা কাঠামো তৈরি করে নিল যে কাজ করতে করতেও বই পড়া চলে। মাঝে মাঝে শ্রমিকদের বই পড়ে শোনাতে লাগল।

এই সমস্ত ব্যাপারটাই চলেছিল মালিকের চেয়ের আড়ালে। মালিক ঘরে ঢুকছে টেরপেলেই বই লুকিয়ে ফেলা হয় আর সবাই চুপ করে যায়।

কিন্তু খুব বেশিদিন কাটল না। একদিন মালিকের কাছে বইসমেত ধরা পড়ে গেল আলেক্সি। ফলে ভীষণ রকমের শাস্তি পেতে হলো তাকে।

কিন্তু সেমিয়োনভ তখনো বুঝতে পারেনি যে আলেক্সি সাধারণ শ্রমিকের মতো নয়। আলেক্সি মানুষের মতো মাথা উঁচু করে চলতে জানে।

একদিন আলেক্সি কাজ করতে করতে কাঠামোর ওপরে রাখা তলস্তয়ের একটা বই পড়েছে—এমন সময় ঘরে ঢোকে সেমিয়োনভ। আলেক্সিকে এভাবে বই পড়তে দেখে তার এমন রাগ হয় যে বইটাকে চুল্লির আগুনে ছুঁড়ে ফেলতে যায়।

সঙ্গে সঙ্গে সেমিয়োনভের একটা হাত চেপে ধরে

আলেক্সি ধমক দিয়ে ওঠে : খবরদার বলছি !

সতেরো বছরের ছেলের মেই ধমক শুনে সেমিয়োনভকে
ফিরিয়ে দিতে হয় বইটা ।

ওদিকে দেরেনকভ একটা ঝটির কারখানা খুলেছে । কার-
খানার আয় থেকে বিপ্লবের কাজে সাহায্য করা হবে । এই
ঝটির কারখানাটাকে ঠিকমতো চালাবার জন্যে ডাক পড়ল
আলেক্সির ।

দেরেনকভের কারখানায় এসে আলেক্সির কাজ আরো
বেড়ে গেল । কারখানার ভিতরে ময়দা মাখা, লেচি তৈরি
করা, এসব কাজ তো আছেই - কিন্তু তার চেয়েও বড়ো কাজ
হচ্ছে ছাত্রদের কামরায় ঝুড়ি ভর্তি করে ঝটি পৌঁছে দেওয়া ।
আর ঝটি দেবার সঙ্গে সঙ্গে আরেকটা জিনিসও সে ছাত্রদের
হাতে গুঁজে দেয় । তা হচ্ছে আগুনের ভাষায় লেখা বিপ্লবের
ইস্তাহার ।

কিছুদিনের মধ্যেই আলেক্সির ওপরে পুলিশের নজর
পড়ে । নিকিফোরিচ নামে একজন পুলিশের লোক ছায়ার
মতো ঘোরে তার পিছনে পিছনে, গায়ে পড়ে তার সঙ্গে
আলাপ করে আর প্রায়ই তাকে নিজের ঘরে ডেকে নিয়ে
হাজার রকম প্রশ্ন জিজেস করতে শুরু করে ।

এই নিকিফোরিচ কথায় কথায় একদিন বলেছিল : গোটা
দেশটার ওপরে একটা জাল ছড়িয়ে আছে । মহামান্য জার
তৃতীয় আলেকজাঞ্চার আছেন এই জালের মধ্যখানে । আর

এই জালের এক-একটা গিঁট হচ্ছে সম্মাটের এক-একজন মন্ত্রী, রাজ্যের এক-একজন শাসনকর্তা, এক-একজন সরকারি কর্মচারী, এমনকী অতি নগণ্য একজন পাহারাওলা পর্যন্ত।

কথাটা আলেক্সিকে খুব ভালোভাবেই বুঝতে হয়েছিল। গোটা দেশের ওপরে পুলিশ আর গোয়েন্দার জাল ছড়ানো আছে। যেখানে যে কেউ অন্য ধরণের কথা ভাবে, সঙ্গে সঙ্গে তাকে এই জাল দিয়ে টেনে তোলা হয়।

আলেক্সি বুঝতে পারল, সেও আস্তে আস্তে এই জালের মধ্যে আটকা পড়ে যাচ্ছে।

সারা দিন কারখানার কাজে নিষ্পাস ফেলবার ফুরসত নেই। কাজের শেষে যখন ঘরে ফিরে আসে তখন এত ক্লান্ত থাকে যে হাত-পা নাড়াবার ক্ষমতা থাকে না। তবুও তারপরে সে একটা মোমবাতি আলিয়ে পড়তে বসে। একটা উলটিয়ে-বসানো প্যাকিং বাক্স হয় তার টেবিল। আর সেই টেবিলে পাশাপাশি সাজানো থাকে তলস্তয় ও পুশ্কিনের রচনা, সেচেনভের শারীরবিদ্যার বই আর জার্মান কবি হাইনের কবিতার বই।

পুলিশের খাতায় লাল-কালিতে আলেক্সির নাম খঠে। কারখানার সামান্য একজন মজুর বই পড়ে— এটাই পুলিশের চোখে একটা অপরাধ। তার ওপরে যে লোক রাত্রিবেলা রাস্তায় রাস্তায় মাতলামি না করে ঘরে বসে আলো আলিয়ে বই পড়ে— সে তো নিশ্চয়ই অতি সাংঘাতিক লোক!

সেই অদৃশ্য জাল আলেক্সির চারদিকে ঘনিয়ে আসে।

১

এর পরের কয়েকটা বছর কাটে ভয়ানক একটা অস্থিরতার
মধ্যে ।

বছর উনিশ যখন বয়েস, তখন একদিন হাইনের কবিতা
পড়ে তার ভারি মন খারাপ হয়ে গিয়েছিল। তারপর সে
বাজারে গিয়ে তিনি রুবল দিয়ে একটা রিভলবার কেনে
আর অনেক রাত্রে কাজান্কা নদীর ধারে ঘূরে বেড়াতে
বেড়াতে নিজের বুক লক্ষ করে গুলি করে বসে ।

তাকে যখন হাসপাতালে নিয়ে আসা হলো। তখন তার
জ্ঞান নেই। ক্ষতস্থান পরীক্ষা করে ডাক্তার রায় দিলেন :
বাঁচবার আশা নেই। তিনটে দিন কাটবে কিনা সন্দেহ ।

ডাক্তারের কথাগুলো কানে যেতেই আলেক্সির যেন
জ্ঞান ফিরে এল। স্পষ্ট গলায় বলে উঠল, না, আমি মরব
না ।

রোগীর এই বেয়াদপি দেখে রেগে গিয়ে ডাক্তার বললেন,
তুমি চুলোয় যাও !

আর সত্যি সত্যিই আলেক্সি বেঁচে উঠল। তারপর
চুলোয় না গিয়ে একটা ঝোলা কাঁধে নিয়ে বেরিয়ে পড়ল
রাস্তায়। রাশিয়ার একপ্রান্ত থেকে আরেকপ্রান্ত পর্যন্ত ঘূরে
বেড়াল পায়ে হেঁটে। মাঝে মাঝে কোথাও বা একটা চাকরি
জুটিয়ে নিয়ে ছ-একদিনের জন্মে ডেরা বাঁধে। আবার বেরিয়ে

পড়ে। একবার রোমাস নামে এক বিপ্লবীর সঙ্গে কিছুদিন
সে এক গ্রামে কাটিয়েছিল। সেখানে একদিন রাত্রিবেলা
জোতদাররা তাদের ঘরে আগুন লাগিয়ে দেয়। চিলকোঠার
ঘর থেকে নিচে লাফিয়ে পড়ে অতি কষ্টে প্রাণ বাঁচায়
আলেক্সি।

কিছুদিন সে এক রেলস্টেশনে রাত-পাহারাদের কাজ
করে। কিছুদিন কাস্পিয়ান সাগরের ধারে জেলেদের সঙ্গে
জীবন কাটায়। চারদিকে মানুষের হানাহানি কাড়াকাড়ি
দেখে মন খারাপ হয়ে যায় তার। একটা ভাঙা কলসির
জন্যে লাঠালাঠি করে বাপ আর ছেলে। গির্জার পাদ্রি নানা
ছুতোয় পয়সা আদায় করে মানুষের কাছ থেকে। কোনো
কারণ না থাকা সত্ত্বেও স্ত্রীকে ধরে মারে স্বামী। এমনকী যারা
অনেক লেখাপড়া শিখে বিপ্লবের পথে এসেছে তারাও যেন
আলেক্সিকে কিছুতেই নিজেদের লোক মনে করতে পারে
না।

আর এই কৃত ও নির্মম পৃথিবীতে আলেক্সির একমাত্র
সান্ত্বনা হয়ে উঠে – বই। হাইনে আর শেক্সপীয়র। রাতের
পর রাত এই ছই দিকপাল লেখকের রচনার মধ্যে ডুবে
থাকে সে।

সে-সময়ে রুশদেশে প্রত্যেককে বাইশ বছর বয়সে
সৈন্যদলে যেতে হতো। আলেক্সিও যায়। কিন্তু তাকে
সৈন্যদলে নেওয়া হয় না। রিভলবারের গুলিতে তার ফুসফুস

ফুটো হয়ে গেছে। সৈন্যদলের কাজের সে অনুপযুক্ত।

তখন আবার সে দীর্ঘ পথ হেঁটে ফিরে এল নিখ-নি-নভ-গোরোদে। রাস্তার লোক তাকিয়ে থাকে তার অন্তুত সাজপোশাকের দিকে। মাথায় চওড়া কিনারওলা টুপি, পরনে পাচকদের মতো শাদা টিউনিক আর পুলিশের দারোগার মতো নীল ট্রাইজার।

আর শুধু রাস্তার লোক নয়, পুলিশেরও নজর পড়েছে। নিখ-নি-নভ-গোরোদে এসে সে বিপ্লবীদের সঙ্গে মেলামেশা শুরু করে, গুপ্তসভায় যায়। এই অবস্থায় আর বেশিদিন আলেক্সিকে বাইরে ছেড়ে রাখা পুলিশের কাছে নিরাপদ মনে হয় না। আলেক্সিকে পুলিশ গ্রেপ্তার করে।

পুলিশের বড়োকর্তা আলেক্সিকে জেরা করতে গিয়ে অ্যাচিত উপদেশ দেয় : দেখো বাপু, কবিতা-টিবিতা লিখতে চাও তো এসব রাজনীতির দিকে এসো না।

পুলিশের বড়োকর্তাটি সে-সময়ে কল্পনাও করতে পারেনি যে, আর কয়েক বছর পরেই এই কাঠখোটা চেহারার ছেলেটির লেখা সারা দেশে বিপ্লবের উত্তাল টেউ তুলবে।

জেল থেকে ছাড়া পেয়ে আলেক্সি এক ছঃসাহসিক কাজ করে বসল। সে-সময়ের একজন বিখ্যাত সাহিত্যিক হচ্ছেন কোরোলেকো। নিজের লেখা একটা কবিতার পাঞ্জলিপি নিয়ে তাঁর সঙ্গে দেখা করল আলেক্সি।

কোরোলেকো মন দিয়ে তার পাঞ্জলিপি পড়লেন।

কয়েকটা অশুল্ক শব্দের দিকে দৃষ্টি আকর্ষণ করলেন। আর ভাষারও যে নিজস্ব একটার ছন্দ আছে, যা আলেক্সির লেখায় তা তখনো আসেনি – সে-কথাটা দৃষ্টান্ত দিয়ে দিয়ে বুঝিয়ে দিলেন। দিন সাতেক পরে তিনি পাঞ্জলিপিটা ফেরত দিয়ে মন্তব্য লিখে দিলেন : নিজের অভিজ্ঞতা থেকে লিখতে চেষ্টা করো।

অভিজ্ঞতা আলেক্সির কম নয়। কিন্তু তবুও তার মনে হতে লাগল, আরো অভিজ্ঞতা চাই। সত্যিকারের জীবনকে এবং সত্যিকারের আবেগকে জানতে হবে।

এই চিন্তাটা অঙ্গীর করে তুলল তাকে। নির্ব্বিন্দি-গোরোদের জীবন অসহ হয়ে উঠল। তারপর একদিন ঘোলা কাঁধে নিয়ে বেরিয়ে পড়ল রাস্তায়।

কিছুদিন কাটল ভল্গা নদীর ধারে ধারে। তারপর জারিংসিনে এসে ভল্গা নদীর পাড় ছেড়ে ঢুকে পড়ল গ্রামাঞ্চলের মধ্যে। বিশাল বিপুল রাশদেশ। দিগন্ত প্রসারিত স্তেপঅঞ্চল। বিচ্চির মানুষ আর বিচ্চির জীবিকা। আর তারই মধ্যে দিয়ে জীবনকে ছুঁয়ে ছুঁয়ে চলেছে শাদা টিউনিক আর নীল ট্রাউজার পরা একটি ছেলে।

রোস্টড-এ এসে কিছুদিনের জন্যে ডেরা বাঁধে। সেখান থেকে গোটা ইউক্রেন হেঁটে পাড়ি দিয়ে চলে আসে একে-বারে বেসারাবিয়া পর্যন্ত। বেসারাবিয়া হচ্ছে রাশদেশের শেষ শহর ; এর পর দানিয়ুব নদী পার হলেই রুমানিয়ার শুরু।

দানিয়ুব থেকে ফিরে যায় ক্রিমিয়া ও ট্রান্স্ককেশিয়ার দিকে !
কৃষ্ণসাগরের ধার দিয়ে দিয়ে অগ্রসর হয়ে পার হয় মল্দাভিয়া,
ক্রিমিয়া, কুবান, জর্জিয়া - গ্রামের পর গ্রাম, শহরের পর
শহর। কাচ প্রণালীতে ডুবতে ডুবতে বেঁচে যায়, জর্জিয়ার
রাস্তায় বরফে চাপা পড়তে পড়তে প্রাণ নিয়ে ফিরে আসে।
আর যেখানেই যায়, খিদের হাত থেকে পরিত্রাণ পায় না।
পাগলা কুকুরের মতো খিদে তাকে তাড়া করে ফেরে।

এইভাবে হাজার হাজার মাইল হেঁটে পার হয়। পূরো
ছুটি বছর ঘুরে বেড়ায় ভবঘুরের মতো।

মাঝে মাঝে আলেক্সি ভাবে, কিসের তাড়নায় সে এমন
অস্থির হয়ে ঘুরে বেড়াচ্ছে ? কী চায় সে ?

নদীর জল তিরতির করে সমুদ্রের দিকে চলে যায়।
ঘাসের ফাঁকে ফাঁকে সরসব শব্দ তুলে ইঁছুর ছুটোছুটি করে।
পাহাড়ি বর্নার জল ফেন। তুলে পাক খায় আর গাছের
শুকনো পাতা খসে খসে পড়ে। কাঠঠোকরা শব্দ করে চলে
- ঠক্, ঠক্, ঠক্, ...

এসব দেখতে ভালো লাগে। কিন্তু তার চেয়েও ভালো
লাগে মানুষকে দেখতে। সব রকমের মানুষ। সব ধরণের
মানুষ। সব সময়ের মানুষ। রুশদেশের সঙ্গে পরিচয় স্থাপন
করতে হবে তাকে।

আর এজন্যে তাকে কম মূল্য দিতে হয় না।

ইউক্রেনের এক গ্রামে এসে এক অঙ্গুত দৃশ্য চোখে পড়ে।

একটি ছই ঘোড়ার গাড়িতে একটি ঘোড়া আছে আর দ্বিতীয় ঘোড়াটির জায়গায় বেঁধে দেওয়া হয়েছে একজন স্ত্রীলোককে। কোচোয়ানের আসনে বসে আছে এই স্ত্রীলোকটির স্বামী। শপ শপ করে চাবুক চালাচ্ছে সে। প্রাণপণে ঘোড়া ছুটেছে আর একই জোয়ালে বাঁধা হয়ে সঙ্গে সঙ্গে ছুটতে হচ্ছে স্ত্রীলোকটিকে। গাড়ির পিছনে হাততালি দিতে দিতে চলেছে গ্রামস্বন্ধ লোক।

স্ত্রী যদি গুরুতর কোনো পাপ করে তাহলে তাকে এইভাবে শাস্তি দেওয়া হয়।

চোখের ওপরে এই দৃশ্য দেখে আলেক্সি রুখে দাঢ়ায়। হতভাগ্য স্ত্রীলোকটিকে বাঁচাতে চেষ্টা করে সে। তখন গ্রামের সমস্ত লোকের রাগ গিয়ে পড়ে তার ওপরে। সকলে মিলে বেদম প্রহার দেয় তাকে। তারপর অঙ্গান অবস্থায় টানতে টানতে নিয়ে গ্রামের বাইরে জলকাদার মধ্যে ফেলে দিয়ে আসে।

বাঁচবার আশা ছিল না আলেক্সির। কিন্তু তার কপাল বলতে হবে, গাড়ি করে যেতে যেতে এক ভদ্রলোক তাকে দেখতে পেয়ে গাড়িতে তুলে নেন এবং হাসপাতালে পৌঁছে দিয়ে যায়।

আরেকবার কুবানের গ্রামাঞ্চল দিয়ে যেতে যেতে আলেক্সি হঠাৎ শোনে যে মাইকপ শহরে সৈন্যরা চাষীদের ওপর গুলি চালিয়েছে। বহু লোক মারা গেছে, শহর ছেড়ে

পালিয়ে গেছে অনেকে ।

সঙ্গে সঙ্গে আলেক্সি গিয়ে হাজির হয় সেখানে । গিয়ে
দেখে, শহরে দারুণ আতঙ্ক, রাস্তাঘাট জনশৃঙ্খলা, ঘরে
বিধবারা চোখের জল ফেলছে ।

শহরে পা দেবার কয়েকদিনের মধ্যেই আলেক্সির ওপর
সৈন্যদের নজর পড়ে যায় । তাকে তারা গ্রেপ্তার করে ।

সৈন্যদলের বড়োকর্তা হাজার রকম প্রশ্ন করে আলেক্সিকে । যে শহর থেকে সবাই পালিয়ে যাচ্ছে – সেখানে এ
লোকটা আসে কেন ? কিন্তু সমস্ত প্রশ্নের জবাবে আলেক্সি
গুরু বলে, রাশিয়াকে জানতে চাই আমি ।

রাশিয়াকে জানতে চাওয়ার অপরাধে দ্বিতীয়বার
কারাগারে যেতে হয় আলেক্সিকে ।

মাইকোপের কারাগার থেকে বেরিয়ে আবার শুরু হয়
পথ চলা । চলতে চলতে শেষ পর্যন্ত সে এসে হাজির হয়
কক্সাসের তিফ্লিস শহরে । এক রেল-কারখানায় কাজ
জুটে যায় ! আবার শুরু হয় শুণু সভায় যাতায়াত, নানা
বিষয়ে আলাপ-আলোচনা আর মজুরদের মধ্যে বিপ্লবী
অচার ।

এখানে এসে আলেক্জান্দার মেফোদিয়েভিচ কালুক্সনি
নামে একজন বিপ্লবীর সঙ্গে আলাপ হয় আলেক্সির ।

আলেক্সির মুখে তার জীবনের নানা ঘটনা শুনে
কালুক্সনি তাকে গল্প লিখতে উৎসাহিত করেন ।

আলেক্সি লিখতে শুরু করে। তার দেখা রাশিয়া এক বিচিত্র রূপ নিয়ে ফুটে উঠে চোখের সামনে।

তারপর একদিন তিফ্লিসের এক সংবাদপত্রের সম্পাদকের হাতে একটি গল্লের পাঞ্জুলিপি আসে। গল্লাটির নাম, ‘মাকার চুজা’। গল্লাটি পড়ে সম্পাদকের ভালো লাগে। কিন্তু অনেক খুঁজেও পাঞ্জুলিপিতে লেখকের নাম খুঁজে পাওয়া যায় না।

সম্পাদক ডেকে পাঠান লেখককে। সম্পাদকের সামনে বসেই লেখক পাঞ্জুলিপির তলায় নিজের নাম লেখেন : ম্যাঞ্জিম গর্কি।

শৈশবের আলয়োশা নয়। কৈশোরের আলেক্সি নয়। আলেক্সি ম্যাঞ্জিমোভিচ পেশ করতে নয়। ম্যাঞ্জিম গর্কি। গর্কি শব্দের অর্থ – তেতো। এই অন্তুত নামকে আশ্রয় করে আমাদের আলেক্সির জীবনে এক নতুন অধ্যায় শুরু হলো।

প্রথম গল্প ছাপার অক্ষরে বেরোবার পরেও কয়েকটা বছর
কাটল নিজেকে পুরোপুরি তৈরি করে নিতে। তিফ্লিস
থেকে গাঁকি আবার চলে এলেন নিখ্নি-নভগোরোদে।
সেখানে এক উকিলের মূহরি হয়ে কাটালেন কিছুদিন।

তারপর নিখ্নি-নভগোরোদ থেকে চলে এলেন সামারায়।
'সামারাক্ষায়া গাজেতা' পত্রিকায় তিনি চাকরি পেয়েছিলেন।

সামারায় এসে তিনি লোকজনের সঙ্গে বিশেষ মেলামেশা
করতেন না। থাকতেন ভল্গা নদীর ধারে ছোট একটা
ঘরে। নিজেকে তিনি মস্ত একটা কাজের জন্যে তৈরি করে
নিছিলেন। অঙ্ককারে হাতড়ে হাতড়ে এতদিনে তিনি
সত্যিকারের পথের সন্ধান পেয়েছেন। স্বতরাং অমানুষিক
পরিশ্রম করতে লাগলেন তিনি।

শেকসপীয়র ও গ্যেটে, ডিফেন্স ও মোপাস়া, থ্যাকারে ও
হুগো, লেরমন্তভ ও বারাতিন্স্কি, ফ্লবেয়ার ও স্টেন্ডাল – দেশের
ও বিদেশের প্রত্যেকের লেখা পড়তে লাগলেন। শুধু পড়া
নয়, ছাত্রের মতো অনুশীলন করলেন।

ভল্গা নদীর ধারে তাঁর সেই ছোটো ঘরে সারা রাত
মোমবাতির আলো জ্বলত। এক-একদিন রোদ উঠে যাবার
পরেও সেই আলো নিবত না।

সামারা থেকে আবার তিনি নিখ্নি-নভগোরোদে ফিরে

এলেন। এখানেও এক পত্রিকা আপিসের চাকরি। এই নির্বিন্দু গোরোদে থাকার সময়েই তিনি অনেক চেষ্টাচরিত্র করে এক প্রকাশক জোগাড় করলেন এবং নিজের সমস্ত লেখা প্রকাশ করলেন ছুটি পৃথক খণ্ডে।

মফস্বল শহরের একজন প্রকাশক মস্ত একটা ঝুঁকি নিয়ে গর্কির গল্লসংগ্রহ প্রকাশ করার পরেই একটা অবাক কাণ্ড ঘটে গেল। রাতারাতি বিখ্যাত হয়ে গেলেন ম্যাঞ্জিম গর্কি। তাঁর বই হাজারে হাজারে বিক্রি হতে লাগল। রাষ্ট্রদেশের সাহিত্যের আকাশ তখন ছাই সূর্যের আলোয় উদ্ভাসিত। একজন লিও তলস্তয়, অপরজন আন্তন চেকভ। এতদিনে তৃতীয় সূর্যের আবির্ভাব হলো। এই তৃতীয় সূর্য ম্যাঞ্জিম গর্কি।

১১

কিন্তু ম্যাঞ্জিম গকির জীবন তলস্তয় বা চেকভের মতো নিশ্চিন্ত
ও নিরাপদ নয়। লেখক হিসাবে তাঁর থ্যাতি ঘত বাড়ে,
জার-সরকারের আতঙ্কও তত বাড়ে। জারের পুলিশ বারবার
তাঁকে জেলে পুরেছে। বারবার দেশ থেকে পালিয়ে বিদেশে
গিয়ে আশ্রয় নিতে হয়েছে তাঁকে। খুব বেশিদিন তাঁকে
কারাগারের বাইরে রাখা জারের পুলিশ কোনো সময়েই
নিরাপদ মনে করেনি।

একবার আফানাসিয়েভ নামে একজন বিপ্লবী অমিককে
পুলিশ তিফ্লিস শহরে গ্রেপ্তার করে। তাঁর ঘর খানাতলাসি
করে পাওয়া যায় ম্যাঞ্জিস গকির একটি ফটো; নিচে গকির
নিজের স্বাক্ষর। পুলিশ এই স্বুধোগ ছাড়ে না। ষড়যন্ত্রের
অভিযোগে তাঁকে গ্রেপ্তার করে। তাঁকে আটক রাখা হয়
মেতেখ ছুর্গে।

কিন্তু শেষ পর্যন্ত এই ষড়যন্ত্রের অভিযোগকে পুলিশ
প্রমাণ করতে পারেনি। গকিকে ছেড়ে দিতে হয়। খালাস
পেয়ে তিনি আবার ফিরে আসেন নিঝ্নিনভ্যোরোদে।

নিঝ্নিনভ্যোরোদে এসে গকি টের পান যে পুলিশ
তাঁর ওপরে সব সময়ে নজর রাখছে। যেখানেই তিনি যান,
একপাল গোয়েন্দা তাঁর চারপাশে ঘুরঘূর করে। তাঁর সঙ্গে
যারা দেখা করতে আসে তাদের পিছনেও গোয়েন্দা লাগে।

গকির জীবন অতিষ্ঠ হয়ে ওঠে ।

তবু পুলিশের এত কড়াকড়ি সঙ্গেও প্রচুর লোক দেখা করতে আসে গকির সঙ্গে । কেউ আসে বই নিতে, কেউ আসে সাহিত্য আলোচনা করতে, কেউ আসে শ্রদ্ধা জানাতে । সবার সঙ্গে দেখা করেন গকি । সবার সঙ্গে নানা বিষয়ে আলোচনা করেন ।

এমনকী আসে ছোটো ছেলেমেয়েরাও । ছেঁড়া জামাকাপড়, খালি পা, উশকোথুশকো চুল । কারও মাথা গুঁজবার ঠাই আছে, কারও নেই । কিন্তু এত গরিব ওরা যে ছবেলা দু-মুঠো খাবারও জোটে না । কোনোরকম আমোদ-আহ্লাদ ওদের জীবনে নেই । ওদের দুঃখ গকির চেয়ে বেশি আর কে বুঝবে ? তাই মাঝে মাঝে গকি এইসব গরিব ছেলেমেয়েকে একসঙ্গে জড়ো করে উৎসবের ব্যবস্থা করেন । ওদের জামা-কাপড়-জুতো কিনে দেন, পেট ভরে মিষ্টি খাওয়ান ।

গৃহহীন ভবঘূরে মানুষদেরও তিনি ভুলে যাননি । ওরা রাস্তায় জমেছে, রাস্তাতেই বড়ো হয়ে উঠেছে, হয়তো রাস্তাতেই একদিন মরে পড়ে থাকবে । গকি নিজেও দশ বছর বয়স থেকে ঘৰছাড়া । তারপর থেকে তাঁর জীবন কেটেছে এইসব মানুষের সঙ্গেই । ওদের কথা তিনি ভুলবেন কী করে ? ওদের জন্মে তিনি তৈরি করে দিলেন আশ্রয়, ব্যবস্থা করলেন আমোদ-প্রমোদের । যারা কোনোদিন নিজেদের মানুষ বলে মনে করেনি তাদের দিলেন মানুষের মর্যাদা ।

আর শুধু এইটুকুই নয়। প্রায়ই তিনি গিয়ে হাজির হন নিব্বন্ধনভোগোদের শ্রমিক-এলাকা সরমতোয়। এখানে গোপন সভা বসে। পড়া হয় বেআইনি বই ও খবরের কাগজ। পুলিশের চোখকে ফাঁকি দিয়ে ‘ইস্ক্রা’ পত্রিকা নিয়ে আসা হয়। লেনিন যে বিপ্লবী দল গড়ে তুলেছিলেন, এই পত্রিকাটি হচ্ছে সেই দলের পত্রিকা। লেনিনের নিজের লেখা থাকে এই পত্রিকায়। গোপন সভায় ‘ইস্ক্রা’ পত্রিকা পড়া হয় আর শ্রমিকদের মধ্যে ছড়িয়ে দেওয়া হয় বিপ্লবের বাণী।

সরমতোর শ্রমিকেরাও প্রায়ই যাতায়াত করে গর্কির কাছে।

১৯০১ সালে গর্কি গিয়েছিলেন সেন্ট পিতার্সবুর্গে। সেখানে চোথের ওপরে দেখলেন ছাত্রদের এক মিছিল ভাঙবার জন্যে পুলিশের নৃশংস তাঙ্গুবলীল। তারপরেই তিনি লিখলেন—‘কোড়ো পাখির গান’।

‘ঝড় ! এই মুহূর্তে ঝড় ঘেটে পড়বে !’

সারা দেশের মানুষ একসঙ্গে এই গান গেয়ে ওঠে। এই গান গাইতে গাইতে জেগে ওঠে সারা দেশের মানুষ।

সেন্ট পিতার্সবুর্গ থেকে ফিরবার পথে গর্কি এক ছঃসাহসিক কাজ করে বসলেন। একটি মিমিওগ্রাফ যন্ত্র নিয়ে এলেন নিব্বন্ধনভোগোদে। মিমিওগ্রাফ যন্ত্র দিয়ে একটি লেখার ছাপ যত খুশি কাগজে তুলে নেওয়া যায়। স্মৃতিরাঙ্গ এধরণের যন্ত্র বিপ্লবীদের খুবই কাজে লাগে। আর পুলিশ

কড়া নজর রাখে, বিপ্লবীরা যাতে কিছুতেই এই যন্ত্র জোগাড় করতে না পারে।

এবারেও পুলিশ টের পেয়ে গেল। রাজদ্বোহের অপরাধে গ্রেপ্তার করা হলো গর্কিকে। নিব্বন্ধনভোদের কারাগারে আটক রাখলেন তিনি।

এবারে প্রতিবাদ ফেটে পড়ল কারাগারের বাইরে। স্বয়ং তলস্তয় সুর মেলালেন সেই প্রতিবাদে। জার সরকার বাধ্য হল গর্কিকে কারাগার থেকে ছেড়ে দিতে। তারপর গর্ক নিজের বাড়িতেই নজরবন্দী হয়ে রাখলেন। বাড়ির সর্বত্র, এমনকী রান্নাঘরে এবং শোবারঘরের বারান্দায় পর্যন্ত বন্দুক-হাতে সান্ত্বি দাঢ় করানো হলো।

কিন্তু সান্ত্বি দাঢ় করিয়ে ঘরের বাইরে যাতায়াত হয়তো বন্ধ করা যায়, ঘরে বসে লেখাকে বন্ধ করা যাবে কী করে? অনেক রাত পর্যন্ত গর্কির ঘরে আলো জ্বলে। নিজেকে তিনি পুরোপুরি লেখার কাজে ছেড়ে দেন।

ব্যাপার দেখে পুলিশের আক্রমণ আরো বেড়ে গেল। তারা সবচেয়ে বেশি ভয় করে গর্কির লেখাকে। আর পুলিশের নাকের ওপরে বসে সেই লেখাটি তিনি লিখে চলেছেন!

তাছাড়া পুলিশ বহু চেষ্টা করেও সরমত্তোর বিপ্লবী অধিকদের সঙ্গে গর্কির যোগাযোগকে কিছুতেই বন্ধ করতে পারেনি। পুলিশের সমস্ত সর্তক ব্যবস্থাকে এড়িয়ে কী করে যে তারা গর্কির সঙ্গে যোগাযোগ বজায় রাখে তা পুলিশ

কিছুতেই ধরতে পারে না ।

তখন মরিয়া হয়ে পুলিশ গর্কির নির্বাসনের ব্যবস্থা
করল। লকুম হলো যে গর্কিকে নির্বাসনে চেড়ে
আর্জামাস নামে অখ্যাত গায়ে গিয়ে বাস করতে হবে।

ইতিমধ্যে গর্কির স্বাস্থ্য একেবারে ভেঙে পড়েছে,
ডাক্তাররা বললেন যে দক্ষিণাঞ্চলে গিয়ে কিছুদিন কাটিয়ে
আসতে না পারলে তাঁর শরীর কিছুতেই সারবে না। ওদিকে
গর্কির নির্বাসনের বিরুদ্ধে সারা দেশ জুড়ে আবার প্রতি-
বাদের ঝড় উঠেছে। স্বয়ং তলস্তয় সুর মিলিয়েছেন সেই
প্রতিবাদে। জারের পুলিশকে ধিক্কার জানিয়ে শোনা
গেছে লেনিনের বজ্রকণ্ঠ।

এবারেও জারের পুলিশ লকুম বদলাতে বাধ্য হলো।
কয়েক সপ্তাহ ক্রিমিয়ায় কাটিয়ে আসার অনুমতি পেলেন
গর্কি।

ক্রিমিয়ায় রাতনা হবার দিন সে এক অন্তুত দৃশ্য। সারা
শহরের মানুষ এসেছে গর্কিকে বিদায় জানাতে। সমুদ্রের
চেউয়ের মতো ফুঁসে উঠেছে, আছড়ে পড়েছে সেই জনতা,
বিপ্লবের গান গাইছে আর ধ্বনি তুলছে : ‘ম্যাঞ্জিম গর্কি
জিন্দাবাদ ! অত্যাচারের অবসান চাই !’

‘রোড়ো পাখির গান’-এর স্থিতিক নিজের চোখেই যেন
প্রত্যক্ষ করলেন নিজেরই লেখার লাইন :

ঝড় ! এই মুহূর্তে ঝড় ফেটে পড়বে !

মঙ্গো আর্ট থিয়েটারে চেকভের একটি নাটকের অভিনয় দেখে গর্কি মুঞ্ছ হয়েছিলেন। মানুষের স্বৃথ-চূঢ়-আশা-আকাঙ্ক্ষাকে যে এইভাবে মূর্তি করে তোলা যায়, তা গর্কি নিজেও ভাবতে পারেননি। তখন থেকেই তাঁর মনে ইচ্ছে ছিল, তিনি নিজেও একটি নাটক লিখবেন।

তারপর ক্রিমিয়ায় থাকার সময়ে একটা যোগাযোগ ঘটে গেল। সে-সময়ে চেকভ এসেছিলেন ক্রিমিয়ায়। আর চেকভের নাটক অভিনয় করবার জন্যে এসেছিল মঙ্গো আর্ট থিয়েটারের পুরো দলটি।

চেকভের সঙ্গে গর্কির দীর্ঘ আলোচনা হল। চেকভ নিজেও গর্কিকে নাটক লিখবার জন্যে বিশেষভাবে অনুরোধ করলেন।

ক্রিমিয়ায় থাকার মেয়াদ শেষ হয়ে যাবার পরে গর্কি চলে এলেন আর্জামাসে। এবং এখানে থাকার সময়েই তিনি নাটক লেখায় হাত দিলেন।

কিন্তু কিছুতেই নিজের পছন্দমতো লেখা আর হয়ে ওঠে না। যতই লেখেন ততই মনে হয় আরো ভালো লেখা হওয়া উচিত। এই সময়ে চেকভের কাছে তিনি কয়েকটি চিঠি লিখেছিলেন। এইসব চিঠি থেকে বোঝা যায় নাটক লেখবার জন্যে কী প্রাণান্তকর পরিশ্রমই না তাঁকে করতে।

হয়েছিল ।

তাঁর লেখা প্রথম নাটকের নাম ‘ফিলিষ্টিন’। ফিলিষ্টিন কথাটা সাধারণত ব্যবহৃত হয় তাদের সম্পর্কে যাদের শিক্ষাদীক্ষা নেই, যারা ভব্যতা-সভ্যতার ধার ধারে না । এই নাটকে তিনি লিখেছেন বেসেমেন্ট পরিবারের কথা । নাটকটি পড়ে বোঝা যায়, নাটকটি লেখার সময় তাঁর দাদামশাই কাশিরিন পরিবারের কথাই বিশেষ করে তাঁর মনে ছিল । তখনকার দিনে রুশদেশের অবস্থাটাই ছিল মন্ত একটা কাশিরিন পরিবারের মতো । তেমনি মারামারি, কাটাকাটি, তেমনি স্বার্থপরতা ও অর্থলোলুপতা । সেখানে কেউ কারও ভালো দেখতে পারে না, টাকার লোভে মানুষ অমানুষ হয়ে যায় । মনে হয় মানুষগুলো যেন এক অঙ্ককার গুহার মধ্যে দিন কাটাচ্ছে । সেখানে বাইরের আলো-হাল্ফ্যাচুক্তে পারে না, ভিতরের বাতাসও বিষাক্ত হয়ে উঠেছে । নিজের ছেলেবেলার সেই রুক্ষস্থাস আবহাওয়ার কথাই গর্কি ফুটিয়ে তুললেন এই নাটকে ।

গর্কির দ্বিতীয় নাটকের নাম ‘নিচুতলার আধারে’ ।

এই নাটকে তিনি যাদের কথা লিখেছেন তারা সবাই তাঁর কাছে খুবই পরিচিত । দশ বছর বয়সে ঘর ছেড়ে বেরিয়ে এসে এদের সঙ্গেই দীর্ঘকাল কাটিয়েছেন তিনি । এরা হচ্ছে সেইসব মানুষ, মানুষের সমাজ যাদের দূরে ঠেলে দিয়েছে । জাহাঙ্গীর বেকার, রাস্তার ভিধিরি, জেল-

ফেরত আসামী—এমনি সব লোক। এরাও যে একসময়ে
মানুষ ছিল, মানুষের মতোই এরা বাঁচতে চায়—এই কথাই
গকি ঘোষণা করলেন তাঁর নাটকে।

মঙ্গো আর্ট থিয়েটারে গকির নাটক অভিনয়ের আয়োজন
চলতে লাগল। আর গকির নাটক অভিনীত হবে শুনে
সবচেয়ে আতঙ্কিত ও সন্তুষ্ট হয়ে উঠল জারের পুলিশ।
অভিনয় বন্ধ করবার সাহসও তাদের ছিল না। অভিনয় বন্ধ
করলে হয়তো সারা দেশের লোক খেপে উঠত।

মঙ্গো আর্ট থিয়েটারে গকির নাটকের অভিনয়ের দিন
দেখা গেল এক অভূত দৃশ্য। সারা প্রেক্ষাগৃহকে উর্দিধারী
পুলিশ ঘিরে ফেলেছে। এমনকী থিয়েটারের কর্মচারীদের
পর্যন্ত সরিয়ে দেওয়া হয়েছে। তাদের স্থান নিয়েছে পুলিশ।
সে দৃশ্য দেখে যে কেউ মনে করতে পারত যে ভয়ানক একটা
কিছু কাণ্ড হতে চলেছে। আজ জারের পুলিশ সতি; সত্যিই
মনে করেছিল, গকির নাটক শহরের লোককে একেবারে
খেপিয়ে তুলবে। মঙ্গো আর্ট থিয়েটার থেকেই হয়তো শুরু
হয়ে যাবে একটা বিপ্লব।

বিপ্লব না হোক, মঙ্গো আর্ট থিয়েটারে সেদিন যে দৃশ্য
দেখা গেল তা অভূতপূর্ব। প্রেক্ষাগৃহের সমস্ত মানুষ বিপুল-
ভাবে অভিনন্দন জানাল গকির নাটককে। শুধু একটা
নাটকের অভিনয় যে এতগুলি মানুষকে এমনভাবে উৎসুকিত
করে তুলতে পারে তা এর আগে জানা যায়নি।

নাটকের অভিনয় চলাকালে শ্রোতাদের অনুরোধে নাট্য-
কারকে বারবার মধ্যে এসে দাঢ়াতে হলো। মধ্যে দাঢ়িয়ে
সেই উদ্বেগিত জনতার দিকে তাকিয়ে গর্কি আরেকবার
প্রত্যক্ষ করলেন :

বাড় ! এই মৃহূর্তে বাড় ফেটে পড়বে !

তারপর ঝড় কেটে পড়তে থুব বেশি দেরি হয়নি। ১৯০৫
সালের ১ জানুয়ারি সেন্ট পিতার্সবুর্গে কয়েক লক্ষ শ্রমিকের
একটা মিছিল বেরিয়েছিল। তারা ‘ইন্ফিলাব-জিন্দাবাদ’
আওয়াজ তোলেনি, একটা দরখাস্ত নিয়ে গিয়েছিল জারের
সঙ্গে দেখা করবার জন্যে। জার তাদের দৃঢ়থত্ত্বার প্রতি-
কার করবেন, এই ছিল তাদের বিশ্বাস। সেই কয়েক লক্ষ
নিরস্ত্র শ্রমিকের মিছিলের ওপর জারের সৈন্যরা গুলি চালায়।
সেন্ট পিতার্সবুর্গের রাস্তায় রক্তের বন্দা বইতে শুরু করে।
প্রাণ হারায় হাজার হাজার মানুষ।

চার বছর আগে গর্কি একবার নিজের চোখে দেখে-
ছিলেন ছাত্রদের মিছিলের ওপর পুলিশের তাগুবলী।
এবার নিজের চোখে দেখলেন, হাজার হাজার মানুষকে
নৃশংসভাবে থুন করার দৃশ্য।

আর গর্কি নিজের কানে শুনলেন রাস্তার মানুষ রক্ত-
মাথা শরীরে উঠে দাঢ়িয়ে চিংকার করে বলছে : ‘আজ
থেকে আমাদের আর জার নেই ! জার থুন হয়ে গেছে !’

শ্রমিকরা যখন মিছিল করে এসে জারের প্রাসাদের
সামনে নতজানু হয়ে বসেছিল তখনো পর্যন্ত সবার মনে
বিশ্বাস ছিল, জার হচ্ছেন তাদের বাপের মতো, বাপ কখনো
সন্তানদের শুধু হাতে ফিরিয়ে দিতে পারেন ?

শুধু হাতে তাদের ফিরতে হয়নি। ফিরতে হয়েছিল
হাজার হাজার সাথির রক্তকু মৃতদেহকে সঙ্গে নিয়ে। আর
জারের যে মূর্তিটি তারা মনে মনে তৈরি করে নিয়েছিল তা
ভেসে গেল এই রক্তের বন্ধায়। জারের পুলিশ আসলে
সাধারণ মানুষকে খুন করেনি, খুন করেছে তাদেরই জারকে।

তারপরেই তৈরি হলো সেন্ট পিতার্সবুর্গের রাস্তায়
রাস্তায় ব্যারিকেড। শুরু হলো প্রতিরোধ।

দেশের এবং বিদেশের মানুষের উদ্দেশে গর্কি এক
আবেদন প্রচার করলেন। আগুনের ভাষায় লেখা সেই
আবেদন। দেশের মানুষকে তিনি সরাসরি ডাক দিলেন
বিপ্লবের পথে। জারের শাসনকে দেশের মানুষ যেন আর
কিছুতেই সহ্য না করে ! খুনি জারকে তারা যেন কিছুতেই
ক্ষমা না করে !

১১ই জানুয়ারি জারের পুলিশ গর্কিকে আবার গ্রেপ্তার
করল। এবার ঠাকে আটক রাখা হলো নরকের মতো
ভয়ংকর এক ছর্গে। গর্কি যে আবার কোনোদিন জীবন্ত
অবস্থায় বেরিয়ে আসতে পারবেন, সে আশা রইল না।

কিন্তু এই নরকের মতো ভয়ংকর কারাগারে বসেও গর্কি
নতুন একটি নাটক লিখতে শুরু করলেন। কারাগারে আটক
করেও জারের পুলিশ গর্কির কলমকে স্তুতি করতে পারল না।

আর এবারেও শুরু হলো প্রবল প্রতিবাদ। শুধু দেশে
নয়, বিদেশেও। ফ্রান্সের বিখ্যাত সাহিতিক আনাতোল

ক্রাঁস গর্কির মুক্তির দাবি জানিয়ে ঘোষণা করলেন : গর্কি
শুধু রাশিয়ার নন, তিনি সারা পৃথিবীর ! প্রতিবাদ জাগল
জার্মানিতে, পতুর্গালে, ইতালিতে, বেলজিয়ামে । প্রতিবাদ
জানালেন সব দেশের সবচেয়ে বড়ো বড়ো শিল্পী, সাহিত্যিক
ও বৈজ্ঞানিকরা । গর্কির লেখা যে দেশে-বিদেশে কত বড়ো
একটা সম্মানের আসনে প্রতিষ্ঠিত ছিল তা এই ঘটনা থেকে
বোঝা যায় ।

আর এই প্রবল প্রতিবাদের সামনে জার সরকার বাধ্য
হলো মাথা নোয়াতে । গর্কি কারাগার থেকে মুক্তি পেলেন ।

সারা দেশ জুড়ে তখন চলেছে বিপ্লবের অন্তর্ভুক্তি ।
বিপ্লবীরা অন্তর্ভুক্ত সংগ্রহ করবার চেষ্টা করছে । কারাগার থেকে
বেরিয়ে গর্কি নিজেও এই কাজে আত্মনিয়োগ করলেন ।

১৯০৫ সালের বিপ্লব শুরু হয়ে গেল ।

কিন্তু শেষ পর্যন্ত এই বিপ্লব সফল হয়নি । জারের
পুলিশ নির্মমভাবে এই বিপ্লবকে দমন করেছিল ।

তখন অবস্থা এমন দাঢ়াল যে গর্কির পক্ষে রুশদেশে
থাকা একেবারেই নিরাপদ নয় । যে কোনো মুহূর্তে জারের
পুলিশ তাঁকে আবার গ্রেপ্তার করতে পারে । তখন বঙ্গদের
পরামর্শে গর্কি পালিয়ে গেলেন দেশ থেকে । প্রথমে গেলেন
জার্মানিতে । সেখান থেকে ফ্রান্সে, শেষকালে আমেরিকায় ।

বিদেশে গিয়েও তিনি এক মুহূর্ত স্থির থাকেননি ।
বিপ্লবের কথা প্রচার করেছেন । বিপ্লবকে সাহায্য করবার

জন্মে টাকা সংগ্রহ করেছেন। অস্যাচারী জারি সরকারে
কুৎসিত ছেৱা স্বার কাছে প্রকাশ করে দিয়েছেন
বিদেশের বিভিন্ন পত্রিকায় তাঁর লেখা বেরোতে লাগল
সমস্ত বিদেশী সরকারের কাছে তিনি আবেদন জানালেন,
খুনি জারকে কেউ যেন একটি পয়সাও সাহায্য না করে।

আর আমেরিকায় থাকাকালেই তিনি লিখলেন তাঁর
সবচেয়ে বিখ্যাত উপন্যাস – ‘মা’। সরমতোর শ্রমিক এলা-
কার যেসব বিপ্লবী শ্রমিককে তিনি নিজের চোখে দেখে
এসেছেন তারাই হলো এই উপন্যাসের চরিত্র। উপন্যাসের
নায়ক পাতেল ও তাঁর মাকে তিনি রক্তমাংসের চেহারায়
দেখে এসেছেন। শ্রমিকদের বীরত্ব ও আত্মত্যাগের কথা,
তাদের আশা-আকাঙ্ক্ষা ও স্বৃত্তচূঁধের কথা তিনি এমন
ভাষায় লিখলেন যা তাঁর আগে আর কেউ লিখতে পারেনি।

জারের পুলিশ খ্যাপা কুকুরের মতো এই উপন্যাসের
প্রচার বন্ধ করবার চেষ্টা করেছিল। কিন্তু পারেনি। গর্কির
নামে আবার গ্রেপ্তারি পরোয়ানা জারি করা হলো।

সুতরাং দেশে ফিরবার আশা ত্যাগ করে গর্কি চলে
এলেন ইতালিতে। সেখানে ক্যাণ্ট্রি দ্বীপে বাস করতে
লাগলেন।

প্রায় সাত বছর তাঁকে থাকতে হয়েছিল এই দ্বীপে।
১৯১৩ সালে যখন তাঁর বিরুদ্ধে গ্রেপ্তারি পরোয়ানা উঠিয়ে
নেওয়া হয়, তখন তিনি দেশে ফিরলেন।

১৯১৪ সালে শুরু হলো প্রথম মহাযুদ্ধ।

১৯০৫ সালের রক্তপাত যে ব্যর্থ হয়নি তার প্রমাণ পাওয়া গেল ১৯১৭ সালের নভেম্বর মাসে। বঙ্গদেশের শ্রমিকরা বিপ্লব করে জারকে তাড়িয়ে দিল সিংহাসন থেকে আর দেশের শাসনক্ষমতা তুলে নিল নিজেদের হাতে।

১৯২১ সালে গর্কির স্বাস্থ্য এত ভেঙে পড়ে যে তাঁকে স্বাস্থ্য-উদ্ধারের জন্য বিদেশে যেতে হয়। আবার তিনি গেলেন ইতালিতে। দেশে ফিরলেন সাত বছর পরে ১৯২৮ সালে।

গর্কির বয়স তখন ষাট বছর। সারা দেশ তাঁকে বিপুল-ভাবে অভিনন্দন জানাল।

আর সেই ষাট বছর বয়সেও গর্কির অদ্যম উৎসাহ ও পরিশ্রম-ক্ষমতা ছিল। কয়েক বছরের মধ্যেই তিনি একাধিক উপন্যাস ও নাটক এবং অজ্ঞ প্রবন্ধ লিখলেন। অনেকগুলি পত্রিকা প্রকাশ করলেন। তরুণ লেখকদের উপর্যুক্ত ও নির্দেশ দিতে লাগলেন। এককথায় তিনি হয়ে উঠলেন সোভিয়েত ইউনিয়নের সাহিত্য-জীবনের শুরু। তাঁর সঠিক পরিচালনা ছিল বলেই সেই সময়কার একাধিক তরুণ লেখক লক্ষ্যভূষ্ট হয়নি। গর্কি ছিলেন বলেই মায়াকোভস্কি এত বড়ো কবি হতে পেরেছেন, আলেক্সি তলস্ত্য হয়েছেন এত বড়ো উপন্যাসিক। গর্কি ছিলেন বলেই সোভিয়েত ইউনিয়নের আধুনিক সাহিত্য এত অল্প সময়ের মধ্যে এত বেশি সমৃদ্ধ।

১৯৩৬ সালের ১৯শে জুন আটষ্টি বছর বয়সে গর্কির
মৃত্যু হয়। মৃত্যুর কয়েক মাস আগেও তিনি বন্ধুবান্ধবদের
বলেছেন : ‘আমাকে আরো চারটি বই লিখতে হবে। প্রতি
চুবছরে একটি বই। অর্থাৎ আরো আট বছর বাঁচতে হবে
আমাকে।’

বেঁচে থাকলে তিনি নিশ্চয়ই আরো চারখানি অমর গ্রন্থ
রচনা করে যেতে পারতেন। জীবনের প্রায় শেষদিন পর্যন্ত
তাঁর কলম থামেনি। আর শুধু যে কলম থামেনি তা নয়,
আটষ্টি বছর বয়সেও তাঁর প্রতিভা কিছুমাত্র স্থিমিত হয়নি।
চবিষ্যৎ বছরের যে তরঙ্গ ‘মাকার চুড়া’ গল্পটি লিখে সাহিত্যের
পথে যাত্রা শুরু করেছিল – চুয়াল্লিশ বছর পরেও তার
তারঙ্গ্য তেমনি অক্ষুণ্ণ ছিল। বরং চুয়াল্লিশ বছর পরে এই
তারঙ্গের সঙ্গে যুক্ত হয়েছিল তাঁর পরিণত চিহ্ন ও বিপুল
অভিজ্ঞতা। ম্যাঞ্জিম গর্কির সারা জীবনটাই হচ্ছে একটানা
এগিয়ে যাওয়া। যেমন-তেমন ভাবে নয়, প্রতিটি পদক্ষেপের
সঙ্গে সঙ্গে তিনি যেন ফুলের এক-একটি পাপড়ি খোলার
মতো নিজের নতুনতর রূপ প্রকাশ করেছেন। আটষ্টি বছর
বয়সেও এই আশ্চর্য ফুলটি দল মেলে চলেছিল। এমন প্রচণ্ড
জীবনীশক্তি এ-যুগের পক্ষে রীতিমতো এক বিশ্বয়।

এক নজরে

- ১৮৬৮—ম্যাঞ্জিম গ'কির জন্ম।
- ১৮৭২—বাবাৰ মৃত্যু।
- ১৮৭৮—মায়েৱ মৃত্যু; গ'কিৰ গৃহত্যাগ।
- ১৮৮০-১৮৮২—শিক্ষানবিশি।
- ১৮৮৪—কাজান শহৱে প্ৰথমে বেকাৰ অবস্থায় ঘোৱাঘুৱি, তাৱপৱে
এক ঝুটিৰ কাৰখানায় চাকৱি।
- ১৮৮৮—বিপ্ৰবী কাজে আঞ্চলিয়োগ। ঝুটিৰ কাৰখানায় কাজ ও
ৱাতপাহাৱাদাৱেৱ কাজ।
- ১৮৮৯—প্ৰথম গ্ৰেপ্তাৱ; মুক্তিৰ পৱে পৰ্যটকেৱ জীৱন।
- ১৮৯২—প্ৰথম গল্ল 'মাকাৰ চুদ্রা'।
- ১৮৯২-১৮৯৮—প্ৰচুৱ ছোটোগল্ল ও উপন্থাস রচনা, উল্লেখযোগ্য
রচনা—'অভাগা পল', 'বুড়ি ইজেৱগিল', 'আমাৰ পথেৱ
সঙ্গী', ইত্যাদি; ১৮৯৬ সালে ক্ৰিয়ায় আগমন; এই
সময়েৱ উল্লেখযোগ্য রচনা—'মাল্ভা', 'কমৱেড',
ইত্যাদি।
- ১৮৯৮—দ্বিতীয় বাৱ গ্ৰেপ্তাৱ; মুক্তিৰ পৱে নজৱবন্দী অবস্থা। দুই
খণ্ডে পুস্তকাকাৱে ব্ৰহ্মবলীৱ প্ৰকাশ। বিপুল খ্যাতি।
- ১৮৯৯—উল্লেখযোগ্য রচনা—'ফোমা গ্ৰাদিয়েড', 'ছাৰিশজন পুৰুষ
ও একটি মেয়ে', ইত্যাদি।
- ১৯০০—উল্লেখযোগ্য রচনা—'তাদেৱই তিনজন'।
- ১৯০১—যিমি ও গ্রাফ যন্ত্ৰে ছাপানো। আবেদন প্ৰচাৱ কৱাৰ অপৱাধে
তৃতীয় বাৱ গ্ৰেপ্তাৱ। উল্লেখযোগ্য রচনা—'ৰোড়ো পাথিৱ
গান'।
- ১৯০২—আৰ্জামাস-এ নিৰ্বাসন। 'নিচুতলাৰ আধাৱে' ও 'ফিলিষ্টিন'

নাটক রচনা।

১৯০৪—‘সামাজিক ফোক’ নাটক রচনা।

১৯০৫—চতুর্থবার প্রেস্তার। জনমতের চাপে মুক্তি। অঙ্গস্ত রচনা।

১৯০৬—আমেরিকায় আগমন। আমেরিকা থেকে ইতালিতে।

উল্লেখযোগ্য রচনা—‘পীতদানবের দেশ’, ‘সাক্ষাৎকার’
ইত্যাদি।

১৯০৭—লণ্ডনে লেনিনের সঙ্গে সাক্ষাৎকার। উল্লেখযোগ্য রচনা
‘মা’, ‘৯ জানুয়ারি’, ইত্যাদি।

১৯০৮-১৯১৩—ইতালিতে অবস্থান। অঙ্গস্ত রচনা। উল্লেখযোগ্য
রচনা—‘নবজাতক’, ‘ইতালীয় কাহিনী’, ‘কশীয় কাহিনী’,
‘আমার ছেলেবেলা’ ইত্যাদি। ১৯১৩ সালে রাশিয়ায়
প্রত্যাবর্তন।

১৯১৫—আঞ্চলিকভাবে দ্বিতীয় খণ্ড রচনা।

১৯১৬-১৯২২—‘তলস্তঘের স্মৃতি’ ও চারটি নাটক রচনা।

১৯২৩—আঞ্চলিকভাবে তৃতীয় খণ্ড রচনা।

১৯২৪—উল্লেখযোগ্য রচনা—‘লেনিনের সঙ্গে’, ইত্যাদি।

১৯২৫—উল্লেখযোগ্য রচনা—‘আর্তামানভ-কাহিনী’, ইত্যাদি।

১৯২৭—উল্লেখযোগ্য রচনা—‘ক্লিম সামগিনের জীবনী’, ১ম খণ্ড,
ইত্যাদি।

১৯৩০—উল্লেখযোগ্য রচনা—‘ক্লিম সামগিনের জীবনী’ ৩য় খণ্ড,
ইত্যাদি।

১৯৩১-১৯৩৫—সাংবাদিকতার ধরনে প্রচুর প্রবন্ধ ও একাধিক
নাটক রচনা। ‘সংস্কৃতি ও জনসাধারণ’ পুস্তকের প্রকাশ।

১৯৩৬—১৯ জুন ম্যাজিম গর্কির মৃত্যু।

